


*Ex Libris*



PROFESSOR J. S. WILL



Library  
of the  
University of Toronto



















## SINGERIE

DES HVGVENOTS,

MARMOTS ET GVENONS

de la nouuelle derrision Theodobes-  
zienne : contenant leur arrest & sen-  
tence par iugemēt de raison naturelle.*Composé par M. Artus Desiré.*

A PARIS,

Pour Guillaume Iullien, à l'enseigne de  
l'Amitié, pres le College de Cambray.

1574.

Avec Priuilege.

*Extraict du privilege.*

**I**L est permis à Guillaume Iulliẽ Libraire Juré en l'Vniuersité de Paris d'imprimer, & exposer en vente ce present liure intitulé, *La Singerie des Huguenots, Marmots, & autres nons de la nouuelle derriſion Theodoſe*, fait & composé par M. Artus apres auoir veu la certification de Docteurs en Theologie de l'Vniuersité de Paris, avec deffenses à tous Libraires & Imprimeurs de ne le faire imprimer ou vendre sans le congé dudit Bailien iusques à trois ans finis & accomplis, sur peine de confiscation des liures qui se trouueroient imprimez, sans son congé, & d'amende arbitraire. Fait le huietiẽsmẽ iour de Mars, 1574.

Signé G E L E E.

# Au Tres-Chrestien

ROY DE FRANCE

Charles neufiesme:

*Artus Desiré, son treshumble Ora-  
teur, grace de Dieu & per-  
petuelle felicité.*

**V**issant Roy tres-chrestien  
des plus grans de la terre  
Qui toute vostre vie  
auez eu trouble & guerre,  
Contre aucuns vos subiectz  
malheureux sacrileges,  
Qui ont prins & pillé  
plusieurs villes & sieges.  
Soubs pretexte & couleur  
d'une religion,  
Qui est trop mieulx nommee  
vne derrision  
Que non pas vnion  
de Chrestiens Catholiques.

Mais congregation  
de paillars hetetiques,  
Homicides, volleurs,  
bandoliers sanguinaires,  
Diables de plein midy,  
mensongiers ordinaires,  
Qui pensent plus sçauoir  
par leur meschante vie  
Que tous les saincts Docteurs  
de la Theologie.  
Et pour ce que superbe  
est leur mere nourrice  
Qui les faict esleuer  
contre vostre iustice,  
Ils sont tant arrogans  
qu'ils ne tiennent de Dieu,  
De Pape ne de vous,  
& veulent en tout lieu  
Avoir tousiours le bon  
sans estre contredits  
En leurs propoz d'erreur  
comme gens estourdis.

Voire & ne recepuoir  
l'interpretation  
De l'Euangile sainct,  
par la tradition  
De nostre mere Eglise  
& generaulx Conciles,  
Où les principaux poincts  
obscurs & difficiles  
Ont esté discutez  
si manifestement,  
Qui ne reste au surplus  
qu'eternel damnement  
Qui leur est preparé  
pour retribution  
De la foy qu'ils ont mise  
en contradiction.  
Et pour raison Seigneur  
qu'ils veulent estre creus  
Et manger tous les poincts  
de l'escripture crus,  
Les faisant condescendre  
à leur charnel plaisir,



Nous auons proposé  
leur monstrier à loisir  
Que leur loy malheureuse  
est damnable & mortelle  
Par le vray iugement  
de raison naturelle,  
Et que de leur Eglise  
autre prouffit n'attendent  
Qu'eternel damnement  
où ils vont & descendent  
Comme vn fagot au feu,  
par diuin iugement.  
A ceste occasion  
vous prions humblement,  
N'auoir acception  
de personne du monde,  
Et faictes que iustice  
en vostre cueur abonde.  
Car elle en fera plus  
sans trouble ne desordre  
En vn heure, que tous  
vos Cheualiers de l'ordre,



Et par mesme moyen  
achetez au poix d'or  
Tous les hommes de bien  
en faiçtes thresor  
Tant au spirituel  
qu'en la iudicature,  
Et principalement  
és lieux de prelature,  
Ou autrement iamais  
vous ne prospererez.  
Et pour raison, seigneur  
quand vous confererez  
Benefice ou office,  
aduisez bien deux foys  
A qui vous le donnez:  
car les Princes & Roys  
Respondront deuant Dieu  
de l'incapacité  
Des mondains vicieux  
remplis de cecité  
Qui n'est pas petit cas,  
mais de grand' conséquence

Plus dangereux beaucoup  
qu'on n'estime ne pense.  
Ce qui vous doibt mouuoir  
d'y mettre gens de bien  
Et non des fauoris  
pour la grandeur du bien,  
Mais de bon exemplaire  
au peuple proufitable:  
Car de tous les abus  
vous serez responsable  
Et obligez comme eulx  
à restitution,  
Des biens & reuenus  
de la fondation  
Que vous leur permettez  
prendre & iouir par force,  
Ce qui faict murmurer  
Et engendrer diuorse  
Entre les ennemis  
aduersaires de Dieu,  
Qui ont veu que nul d'eulx  
ne residoit au lieu

Et prins

Et prins possession  
de leurs sieges vacans,  
Pour laquelle raison  
se sont faiçts predicans  
De leur autorité  
contre la prelature.  
Dont pour remettre bien  
les choses en nature  
Et en leur premier poinct  
sans contradiction,  
Donnez nous des pasteurs  
vaisseaux d'election  
Qui sçachent bien que c'est  
de la sainte escripture.  
Et par mesme moyen  
en la iudicature,  
Gens consciencieux  
pour corriger les vices,  
Et leur donnez gratis  
Tous voz Royaux offices  
Afin qu'ils ne soient point  
si subiectz à la pince.

Car c'est vn grand peché  
& reproche à tout prince,  
De vendre à purs deniers  
aux nobles & petis  
Iustice qu'il leur doibt  
administrer gratis.  
Pour ce nous vous prions  
en toute humilité,  
Vser en ce faict là  
de liberalité  
Enuers iuges qui soient  
sans reprehension,  
Vertueux & sçauans  
de bonne affection.  
Considerant Seigneur  
que c'est de l'homme humain  
Qui est auiourd'huy Roy  
pour mourir lendemain  
Sans terme d'un seul iour  
ne de minute d'heure,  
Et fault soit tost ou tard  
que tout le monde meure

Par vn arrest de Dieu  
sans appellation.  
Prenez bien (si vous plaist)  
ceste admonition  
Et aduertissement  
qui est pour vostre bien,  
Duquel procedera  
(si Dieu plaist) vn grand bien,  
Pourueu que vous faciez  
(comme dict est) iustice,  
En tout temps & saison  
sans vendre aucun office,  
Et que de gens de bien  
vous faciez vn thresor :  
Lesquels vous vaudront mieux  
que vos coffres plains d'or.  
Car florir vous feront  
en toutes voz affaires  
Et venir au dessus  
de tous voz aduersaires,  
Mais que vous chassez hors  
del'Eglise de Dieu

Tous ces gros haubereaux,  
qui occupent le lieu  
Des gens de bien lettrez  
consumez en science,  
Lesquels ont le sçauoir  
& vraye experience  
De la sainte escripture  
où ils ont pratiqué.  
Et non pas ces guerriers  
qui ont Dieu prouoqué  
A fureur & à ire  
à l'encontre de nous,  
Ce sont larrons priuez  
plus auares que loups,  
Layques, mariez  
qui mangent la substance  
Et le pain de douleur  
des pources de la France,  
Contre l'intention  
de tous les fondateurs  
Qui ont donné les biens,  
que les faulx predateurs

Sans chanter ne baller  
deuorent à puissance,  
Dont le sang innocent  
demande à Dieu vengeance,  
Et à vous Sire Roy  
qui les intronisez  
Au lieu de gens sçauans,  
qui sont scandalisez  
Du desordre qui est  
en l'ecclesiastique.  
Et pour le grand deffault  
Prince tref-catholique,  
Les ennemis vous font  
vne guerre maligne  
Et vous viennent chercher  
iusques à la racine  
De la cause motiue,  
à raison des susdicts  
Gens excommuniez,  
sacrileges maudicts.  
Et si vous n'y mettez  
autre gouuernement



Toufiours la guerre aurez  
par diuin iugement,  
Encor que vous euffiez  
tous les princes pour vous:  
Car Dieu fera plus toft  
à l'encontre de nous  
Les pierres fusciter  
que nous donner la paix.  
Vostre office Royal  
est vn pondereux faix,  
Pour ce faictes en faire  
vne iustice grande  
Et des blasphemateurs  
comme Dieu vous commande,  
Punissez les volleurs,  
les vfures publiques,  
Les inobediens  
Huguenots heretiques,  
Les renonceurs de Dieu,  
les superfluitez,  
Les estas corrompus,  
les grandes vanitez,



Les abus d'iniustice  
& de la prelature,  
Cent mille autres pechez  
contre humaine nature.  
Et ce faissant, Seigneur,  
Dieu qui est en courroux  
Retirera son ire  
& sa fureur de nous.  
Voire, & nous donnera  
tant de biens à largesse  
Qu'à les voir sur les champs  
sera grande noblesse,  
Et n'y aura Guenon,  
Huguenot, ne Marmot,  
Ny diable deschainé  
qui ose dire mot.  
A ceste occasion  
nous auons composé  
Ce petit liure icy  
de long temps proposé,  
Et combien Sire Roy  
que l'œuure soit indigne

Vous estre dedié,  
comme chose plus digne,  
Si est-ce qu'auons pris  
l'audace & hardiesse  
Vous en faire present  
& à vostre noblesse,  
Esperant que prendrez  
de vostre humble orateur,  
Ce labeur & present  
qu'il vous faict de bon cueur.  
Vous suppliant Seigneur,  
vous tenir sur voz gardes,  
Et garnir voz chasteaux  
de canons & bombardes:  
Car tous les maulx & passez  
& tristiferes pleurs,  
Ne sont qu'adiournemens  
de plus grandes douleurs,  
Parce qu'il n'est possible  
aux Monarques & Roys,  
Avoir paix asseuree  
à conceder deux loix.

DV THRESOR DE  
*Dieu, crocheté par les Singes,  
Marmots, & Guenons de  
la nouvelle derrision.*



VAND vn bon marchāt  
ou pere de famille a char  
ge d'enfans & seruiteurs  
à nourrir, & qu'il veult  
aller en loingtaine regiō  
pour le trafic de marchā-

dise, la premiere chose qu'il faict, c'est, dis-  
poser de ses affaires & negoces, & donner  
toutes charges à sa femme, pour condui-  
re & gouuerner sa maison, à laquelle il  
baille les clefz de son thresor, pour payer  
ses seruiteurs & ouuriers selon qu'il a cō-  
uenue de pris avec eux : mais si les larrons  
& voleurs viennent à crocheter la ferru-  
re, & à mesler les gardes, il n'y a point de  
faute qu'ils gasteront tout, & faudra re-  
courir aux ferruriers, pour la racoustrer &  
remettre en sa premiere forme. Or à ce  
propos disons, que nous auons vn pere de  
famille, qui est nostre sauueur Iesus christ,  
lequel partant de ce monde pour retour-

ner vers Dieu son pere, a donné toutes charges à son espouse nostre mere sainte Eglise Catholique & Romaine, & d'ordonner loix & statuts, pour le regime & gouvernement de ses enfans & seruiteurs domestiques, & luy a laissé les clefz de son thresor, qui est le vray sens & intelligence de la sainte escriture, enfermee & cachee sous la serrure, c'est à dire, sous la lettre obscure, & difficile, qui occist & tue les orgueilleux & superbes larrons, qui la pèsent penetrer & ouvrir sans les clefz de ladicte Eglise, qui ne l'a voulu communiquer à tout le monde, pour le mespris & contemnement qu'on en eust faict. Mais seulement aux venerables docteurs & autres gens de sçauoir, qui ont faict professiõs saintes escritures, & de l'ouuerture d'icelle, pour couper & distribuer le pain de ladicte escriture au simple peuple, qui le doit prendre & recevoir de leur main en toute humilité de cœur, sans se formaliser ne enquerir, pourquoy, & comment les haults mysteres de Dieu se peuuent faire, mais croire fermement que tout ce qu'il luy est baillé par ladicte Eglise, est pour son salut & proufit. Donc pour ou-

ourrir ledict thresor, est requis auoir de bõnes clefz qui ne soient point fauses, mais celles mesmes qu'il a laissees à ladicte Eglise, quand il a dit à saint Pierre: *Tibi dabo clauis regni cœlorũ*. Soubz lesquelles sont (comme dict est) cachez & couuers, les grands secrets, sentences, & misteres diuins de nostre redemptiõ, aux ambitieux & rebelles heretiques: *Vt videntes non videant, & audientes non intelligant*, mais aux humbles de prudence & sçauoir, qui s'estiment indignes de la lire, entendre, & exposer, comme les susdicts docteurs & peres anciens, qui d'un mesme accord & consentement ont fuiuy les traces & vestiges de ladicte Eglise vniuerselle, qui a les clefz dudict thresor de Dieu, qu'homme viuant ne peut ouurir ne entēdre, sans l'interpretation d'icelle, tesmoing mōsieur saint Augustin, qui dit, que sans son authorité ne croiroit l'Euangile: car elle seule a reuelation, & congnoist la valeur des pieces d'or & d'argent, qui sont lesdictes sentences & difficiles passages, enfermez & cachetez (comme dict est) soubz ladicte ferrure litterale. Et combien que dès le commencement de ladicte Eglise, plu-

fleurs les Singes, Marmots, & Guenons  
 diaboliques, cōme ont esté les Nicolaïtes,  
 Arriens, Manichiens, Priciliens, Vigilanti-  
 tiens : & de nostre temps, les Lutheriens,  
 & autres vne infinité, se soient efforcez de  
 crocheter & desrober ledict thresor, si est-  
 ce que iamais n'ont sceu trouuer les moy-  
 ens de l'ouurir ne penetrer, par ce que  
 toutes leurs clefz se sont trouuees fauses,  
 c'est à dire, leurs langues vulpines, mes-  
 châtes & mensongeres, de sorte qu'ils ont  
 meslé les gardes de ladicte serrure par  
 leurs heresies & faulses propositions d'er-  
 reur. Donc pour la racoustrer & remettre  
 en sa premiere forme, il a falu recourir  
 aux Serruriers, qui sont les saincts Conci-  
 les generaux, lesquels ont faict leur deuoir  
 d'y mettre ordre, & de corriger les abus &  
 fausetez qui se commettent en l'estat Ec-  
 clesiastique, par la mauuaise vie des sacri-  
 leges larrons & voleurs symoniaques, qui  
 sont entrez en la bergerie de Iesus Christ  
 par les fenestres de la court, & nonobstāt  
 leurs saints decrets & status canoniques,  
 les dessusdicts larrons, ne se sont voulu de-  
 porter de leur meschanceté, ne laisser la  
 pluralité de leurs benefices, encores que



lesdicts Conciles leur ayent remōstré par viues raisons estre vne chose damnable & mortelle , qui prouoque l'ire & fureur de Dieu à l'encontre de nous , pour aucune remonstrance ne defense ne se sont voulu desister de leur auarice & ambition, ains ont persisté plus que iamais à ruiner & destruire ladicte Eglise de fons en comble, laquelle peut diffinir de toutes choses qui concernent nostre salut, se reseruant plusieurs hautes matieres & passages de difficile intelligēce, qui n'appartiēēt estre presentez ne communiquez à gens rustiques & ignares, qui n'ont l'estomach suffisant, ne disposé, pour sçauoir digerer la viande crue, qui est ladicte escriture saincte, laquelle par si long temps & tant de fois les ennemys de verité, se sont efforcez la desrober, desguiser, & contrefaire, qu'ils ont rompu & brisé ladicte serrure litterale, comme au lieu de dire, *In principio erat Verbum*, ont dict, *erat sermo*, & tant d'autres vne infinité de passages qu'ils ont falsifiez & corrompus, qu'il a tousiours salu (comme dict est) retourner aux maistres Iurez Serruriers des susdicts Conciles pour cōfuter & debeller les profuges & bannis de

la congregation des fideles & Catholiques, en maniere & façon que iamais ladicte Eglise n'a eu iour de repos, pour se defendre & garder d'eux, principalement de ceux de present pires sans comparaison, que tous les autres du passé, qui se sont tousiours raportez & condescendus à la determination & diffinition desdicts Conciles : au contraire de noz modernes heretiques, qui ne se veulent accorder ne rapporter du different qui est entre eux & nous, qu'à leur propre iugemēt, sans vouloir rien tenir de Dieu, ne de Roy, non plus que du diable d'enfer. Et telles manieres de gens sont proprement les escumes de Religion comme quand vn pot boult sur le feu, il s'esleue vne grosse escume, qui sort hors d'elle mesme, si on ne l'escume, encor que ledict pot soit bien couuert: ainsi sont les Apostatz lubriques & charnels sortis de leur conuent, comme Iudas, qui s'escuma & sortit hors du college de Iesus Christ, de sa propre volenté malicieuse, ainsi sont ils sortis de leur cloistre, par la chaleur du feu de pail-lardise, & les bonnes pieces de chair, qui sont vrays Religieux & Religieuses, sont



demourez en leur discipline reguliere, & se sont cuitz au feu de charité & continence: & tout ainsi que l'eau qu'on iecte sur vn pot couuert, se respand par terre, aussi le cœur d'un heretique dissimulé & couuert d'incrédulité & d'urité d'esprit, ne peut rien receuoir ne comprendre de la parole de Dieu, pour l'empeschement qu'il y donne, à raison de son orgueil, qui est insuperable, cōme dict monsieur saint Augustin *contra epistolam Manichæi*, que superbe est la mere nourrice des susdicts heretiques charcutiers d'enfer: car ledict orgueil & ambitio les rend si obstinez & endurcis en leur heresie, que pour mourir, ne croiront autre chose que ce que bon leur semble, & pource dit monsieur saint Iean Chrysostome, *Homilia sexta in Epistolam ad Titum: Neque enim eos vnquam lucrari poterimus qui peruersi sunt*. Iamais (dit-il) nous n'auons sceu vaincre ne gaingner, les peruertis & corrompuz de faulse doctrine. Ce que dit aussi Terullien, *libro De prescriptionibus hereticorum*, que c'est temps perdu de se vouloir deffendre des escritures cōtre les heretiques, par ce que tousiours la veulent faire condescendre à

leur plaisir charnel, & interpreter selon leur fantasie, afin d'estre iuges de leur propre cause, voire & aiment trop mieux mourir (dit monsieur saint Bernard, *in Cantica*) que d'estre conuaincuz en leurs propositions d'erreur, *probatum est, mori magis eligunt quàm conuerti*. C'est vne chose toute prouuee, qu'ils aiment mieux eslire la mort que se conuertir, tant sont superbes & ambitieux, ce qui les faiçt tōber en eternelle damnation, faute d'humilité & de receuoir l'interpretation de ladicte Eglise, comme dit aussi monsieur Saint Hilaire, *libro secundo de Trinitate*, que plusieurs malheureuses gens la veulent interpreter selon leur affectiō & volonté, & pour ce qu'il n'y a moyen de les retirer par lesdictes escritures, attendu qu'ils les veulent exposer selon leur propre sens & esprit de fornication. Nous à ces causes, auons proposé (moyennnant la grace de Dieu) leur remonstrer & prouuer, par les dictes raisons naturelles leurs faulx opinions reprouuees, & que tous les propos qu'ils mettent en auant contre nous, ont esté tant de fois condamnées par lesdicts Conciles & peres anciens, qu'il

qu'il n'est memoire du contraire, de sorte qu'ils ne scauroiēt contredire ne reiecter l'interpretatiō des dictes escritures qu'on leur allegue. S'il y a quelque raison en eux, ou bien s'ils ne sont transportez d'entendement, & pires que bestes brutes: car la dicte raison leur sera si manifeste & apparente qu'ils se condamneront d'eux-mesmes, & diront que tout ce qu'ils produisent en leur Eglise maligne, n'est que toute refuerie & mensonge, non pas que voulions disputer des choses qui sont supernaturelles, que le Ciel & terre ne scauroient cōprendre, comme de la transsubstantiation du pain & vin, au precieux corps & sang de nostre Sauueur Iesus Christ, & de la Conception de la Vierge mere de Dieu, sans peché originel: mais bien de plusieurs autres articles de foy, que nous sommes tenus croire & tenir sur peine de damnation eternelle, ce que deliberons leur faire entendre, sans alleguer aucune autorité des dites escritures, afin qu'ils se puissent condamner *ex proprio iudicio*, ou biē qu'ils soient plus que malheureux Atheistes, sans aucune memoire ne congnoissance de Dieu, laquelle-

le raison leur fera ( ou deburoit estre ) vne resne & bride, pour les retirer du mauuais chemin où ils sont tombez à l'imitation de nostre Seigneur, qui souuentefois a parlé par raisons, figures & paraboles aux grans & petis, pour plus facilement leur faire entendre les choses diuines par les choses humaines. Et combien qu'il ait donné aux creatures raisonnables, sensitiues, & vegetatiues, vn naturel de diuerses proprietéz & vertus, selon sa disposition & prouidence diuine, & qu'il nous semble aduis, par le cōmun & ordinaire cours de leurs effaiçts, que telles choses se facent d'elles mesmes, sans son ayde & croissence, si est-ce toutesfois que les dictes creatures, ne se peuent en rien qui soit ressentir de leurs qualitez & dons de grace, qu'en la vertu & puissance d'iceluy autheur de nature, lequel c'est reserué plusieurs autres choses supernaturelles, tant admirables & incomprehensibles, que le ciel & terre ( comme dict auons ) ne sçauroient comprendre la cent miliesme partie de la grandeur & profondeur de son omnipotence, comme auoir faict & créé toutes choses *ex nihilo, quia se-*


*secundum naturam ex nihilo nihil fit*, dont il a conuenu pour nostre salut qu'il se soit cōdescendu à nostre fragilité, pour plus facilement nous faire les choses entendre, ainsi qu'il a parlé plusieurs fois à ses Apostres & disciples par locution figuratiue, soy comparant à vn pere de famille, à vne vigne, à vn lyon, à vn vers de terre, à vn serpent, à l'exemple duquel nous est permis remonstrer & faire entendre les choses celestes par les terrestres similitudes & paraboles fondee en raison, non pour en esperer la cōuerfion d'un orgueilleux rebelle obstiné, *Qui secundum duriciam cordis sui, & cor impœnitens thesaurisat sibi iram in die ire*: Mais bien pour celuy qui n'est encore du tout confirmé en infidelité, qui se laisse perdre & gagner petit à petit, faute de remonstrance & aduertissement. Ce que faisons à l'intention de les retirer & ramener au grand chemin de la sainte cité de Ierusalem celeste, qui est fort penible & estroit à cheminer pour eux, par ce qu'on y peut aller que par ieusnes, prieres, oraisons, aumosnes, abstinences, labeurs, peines & trauaux, au cōtraire de celuy de la maison babylonique des huguenots,



lequel est fort grand & frequenté de toutes sortes & manieres de gens sanguinaires & larrons fondez en liberté de conscience, à yurōgner, manger, paillarder & entrer au paradis des singes & guenons tous chauffez & vestus, disant auoir la vraye Eglise de Iesus Christ, & l'intelligence de la pure verité de l'Euangile, dont il n'est (comme dit auōs) possible de les vaincre ne confuter par lescrites escritures. Ce qui nous a donné occasion leur remontrer leurs fautes & erreurs par lescrites raisons naturelles, afin que par leur propre iugement se puissent condamner d'eux mesmes & cōfesser que toutes leurs presches & synodes ne sont q̄ singeries & risées de folastres. Combiē que ladicte matiere ne se doibue esclarcir ne disputer que par sentences & autoritez desdites escritures, si est-ce que nous sommes cōtraincts alleguer lescrites raisons pour l'obstination & malice de ceux esquelz nous auons affaire. Ce qui sera cause (Dieu aydant) q̄ quelques vns d'entre eux errās par ignorāce, se pourrōt recōgnoistre & reuenir à l'obeissāce de nostre mere sainte Eglise, hors laquelle il n'y a point de salut.

7

LA SINGERIE DES  
Huguenots, Marmots & Guenons  
de la nouvelle derrision  
TheodobesZienne.

 R premier que d'entrer en la matiere que voulõs traicter, il nous a semblé bon, declarer & remõstrer la grande malice & cautelle de noz Theodobesiens heretiques, lesquels sont (dit saint Hierosime) de la nature & proprieté des Singes, Marmots & Guenons, qui contrefont tout ce qu'ils voient faire. Comme le Singe d'enfer, qui a veu que nostre seigneur Dieu auoit vne Eglise fondee *supra firmam petram*, laquelle il a voulu contrefaire, & en bastir vne sur le sable de discord & diuision, dãs les estables & teçts à pourceaux, pour y prescher blasphememes & erreurs, ainsi que chacun a peu voir depuis les premiers troubles iusques à ce iourd'huy, & au lieu d'un souverain pasteur, qui est nostre saint pere le Pape acompaigné de venerables Cardinaux, Archeuesques, Euesques, Abbez, Curez, Vicaires, Religieux, & autres per-

sonnes ecclesiastiques. Il a inthronisé en sa Synagogue diabolologique, vn lubrique prieur de Longemeau, nommé Theodose de Baïse, suiuy d'une infinité d'Apostats, moines reniez, sacrileges, Symoniaques, larrons, homicides & volleurs, pour l'exercice de son infecte & dānee derrision, & par mesme moyen au lieu des images des saincts & saintes de paradis, il a introduit & erigé l'Idole d'un Cupido, d'un Iupiter, d'une Venus, d'une Pallas, Minerue & autres faux dieux & Deesses despainctes toutes nues, en leurs Chābres, Cabinets, & sales, pour exciter & prouoquer à luxure & paillardise ses Marmots & Guenōs, Outre plus à veu ledict Singe d'ēfer, qu'en la Catholique & Romaine, il y auoit des cloches, pour appeller & cōgreger le peuple de Dieu, au lieu desquelles il a prins des harquebouzes, pistolles & autres instrumens d'enfer, pour assembler sesdicts Marmots & Guenons au bruiet & son de leurs bōbardes & canons, qui sonnēt de nuict au lieu desdites cloches, dont en petit de temps, se sont si biē multipliez qu'il a augmenté son Eglise maligne des trois parts, depuis la mort du feu Roy Henry,



que Dieu absolue, de sorte & maniere qu'en sa singerie a renuersé tout ce dessus deffoubs, & en premier lieu le saint Sacrement de Baptisme, auquel sont contenus plusieurs coniurations & exorcismes à l'encontre de luy, pour l'expiation de la coulpe originelle par l'eau de benediction, ce qu'il a contrefaict & changé en opprobre & vilennie d'une eau orde, sale & corrompue, disant en son baptisme. Nous n'entendons lauer aucune chose en cest enfant, par ce qu'il est lauë au sang de Iesus Christ, & baptisé en la foy de ses parens, par ledict baptisme qui signifie seulement la remission des pechez. Voila ce que dit maistre ambrelin de Baïse en son catechisme, & mesmement en l'exortation qu'il faict deuant ledict baptisme, dont ensuit une grande source d'heresie: attendu que leur credence & maniere de faire est contraire à l'intention de toute l'Eglise vniuerselle, qui est de pardonner & remettre lesdicts pechez, à tous ceux & celles qui le reçoient, & non aux susdits Singes & Guenons qui au lieu des saintes parolles proferees avec l'ablution de l'eau benite, corrompent toute la forme dudit

baptisme par mespris & contemnement  
des traditiōs & ceremonies de noz saincts  
peres, Apostres, Martyrs, Cōfesseurs, Vier-  
ges, saincts & saintes de paradis, il a veu  
semblablement qu'en nostredicte Eglise  
y auoit vn chāt ecclesiastique, d'hymnes,  
profes, respons, cantiques, legendes &  
psalmodies, lesquelles il a contrefaiçtes &  
renuersees, par vn tas de folles chansons  
scandaleuses & prophanes, composees  
d'un Clement Marot, qui a grandement  
trauailé à la controuersion d'icelles pour  
dōner plaisir de damnation ausdicts Sin-  
ges, qui ne sçauoiēt que dire ne chāter en  
leus Synagogue Lutherienne auparauant  
qu'il les eust mises en lumiere: mais depuis  
qui les ont euës en vsage, ils se sont effor-  
cez de les publier & chanter à voix tuba-  
le & gorge desployee, pour faire oublier  
& cesser l'arnionie des susdicts chans ec-  
clesiastiques, tant bien ordonnez & à pro-  
pos selon les temps, qu'ils excitent sou-  
uent le peuple à larmes, pleurs & deuotiō  
oyant les orgues respondre au seruice di-  
uin, au lieu desquelles ils vsent de violōs,  
lucs, guitermes, & autres instrumens pro-  
uoquans à ladicte luxure & paillardise,  
pour

pour refiouir leſdictes guenons montees ſur les croupes de leurs grans cheuaux, en allant aux preſches, ſynodes & prieres faiſtes hors la foy de l'Egliſe. Et au lieu d'encens que nous reſpātons és feſtes ſolennelles (qui repreſente les oraiſons des vrais fideles & catholiques) ils ont muſc, ciuette, perfū & autres odeurs lubriques pour corrompre la ſenteur des greſſes & onguens de leurs miniſtres gouiteux & verollez, qui changent & muent le S. Sacremēt de mariage en cōcubinage & fornicatiō, cōtractant entre Moines Apoſtats & Religieuſes impudiques, iuſques aux parens & parentes, ſāns aucun eſgard ne reſpect à la conſanguinité & deſſence de Dieu & de ſon Egliſe. Et outre toutes ces choſes ont tenu chapitre general, & aſſemblé tous leurs maiſtres embrelins, auquel a preſidé le grand diabologien de Baiſze pour diſcuter & contrefaire la māducation ſpirituelle du precieux corps & ſang de noſtre ſauueur Jeſus Chriſt au S. ſacremēt de l'autel, offert à Dieu le pere, pour la remiſſion de noz pechez, contre lequel ont proferé cent mille iniures & blaſphemes de damnation, & ordonné

vne cene iudaïque à leursdits Marmots & Guenons, qui māgent le pain d'angoisse & douleur, en derrision & mocquerie de la memoire, grace & benefice qu'il nous a laiss   par testament & tesmoignage de sa parolle, disant, *hoc est corpus meum quod pro vobis tradetur*: par lesquelles parolles, ne faut qu'ils s'attend  t recepuoir autre salaire ne retribution de leur singerie, que malediction & damnation   ternelle. Ils ont veu d'aduantage, que nostreditte Eglise Catholique estoit couronnee d'une gr  de multitude de vierges sanctimoniales, desquelles la pudicit  , & chastet   estoit sa gloire, ainsi que dit monsieur saint Cyprien *libro quarto, epistola secunda ad Antonianum*, au lieu desquelles ont retir   les   cumes de religion, qui sont concubines & paillardes seduited & mises (c  me dict est) hors leurs Conuens & Monasteres, pour couronner leur dicte Eglise maligne d'inceste & fornication contre le precepte & commandement de Dieu qui dict, *Vouete, & reddite Domino Deo vestro vota*. Et bref, ils sont tant cauteleux, ingenieux & malicieux, que ne s  aurions mieux les comparer qu'aux predicts Sin-

ges, Marmots, & Guenons, lesquels n'approchent iamais du feu que la hart du fagot qu'on y met, ne soit premierement bruslee & rompue, peur que le dict feu ne rejalisfe sur eux, tout ainsi ont faict noz ennemis & aduersaires de verité, tant que la hart de iustice a tenu bon, & qu'elle a esté forte & puissante pour les pendre & brusler, sans rōpre ne ployer, iamais n'ont osé approcher de la fumee, ne ouurir la bouche pour dire ce qu'ils auoient sur le cœur: mais depuis que ladiète hart a esté rompue, & qu'ils ont eu liberté & permission de parler, & prescher leurs blasphemies contre Dieu & ses saincts, lors ils n'ont plus craint d'approcher dudit feu, & sont venus iusques deuant la majesté du Roy, & de tous ses magistrats & gouuerneurs vomir leur fetulence & vilennie au Conciliabule de Poissy, & crier par toutes les rues de Paris, iusques en plaine Court, Viue l'Euangile, Viue l'Euangile, voire l'Euāgile du diable d'enfer, qui vous puisse rompre le col & les iambes, de vous auoir donné licence de faire le beau mesnage que vous auez faict par tout le Royaume de France, & d'auoir sacrilegé & re-



tiré hors des Religions lesdictes Sancti-  
moniales, que vous avez subornees, &  
peruerties de leur discipline Reguliere,  
leur faisant entendre qu'il est impossible  
de garder le perpetuel vœu de continen-  
ce & chasteté, de sorte qu'au lieu de ladi-  
cte Religion, ils ont faict des bordeaux de  
concubinage, pour accomplir leur pail-  
lardise & fornication, suyuant la nature  
des susdicts Marmots & Guenons, qui  
sont les plus luxurieuses bestes de tout le  
monde. Ledit Singe d'enfer a veu d'auā-  
tage qu'en ladicte Eglise de Dieu, il y a-  
uoit vne legēde doree des Apostres, Mar-  
tyrs, Confesseurs, Vierges, Saincts & Sain-  
ctes de Paradis, contre laquelle il a faict  
vn catalogue de ses faux martyrs & sa-  
crileges, qui ont esté bruslez auant que la-  
dicte hart de iustice fust rompue, & ont  
colligé tous leurs faicts & gestes, pour sou-  
uenance, & perpetuelle memoire de la  
mal-heureuse & detestable vie qu'ils ont  
menee & soustēne iusques à l'article de  
la mort, & tout ainsi que les susdicts Mar-  
tyrs de Iesus Christ, ont prins couronne  
de martyre pour le nom de Dieu, & de sa-  
dicte Eglise, eux ont prins mort pour le

nom du diable d'enfer, qui les a courõnez & marquez du caractere de la grand' beste, pour leurs blasphemies & crimes de leze maiesté diuine & humaine, & comme les susdicts Apõstres & martyrs de Iesus Christ sont venus en mourant : ceux du dict Singe d'enfer sont venus en tuant & massacrant tous gens de bien & fideles à Dieu. Et bref, c'est vne beste fort ingenieuse & malicieuse que le Singe, & pource les Bateleurs (qui ne sçauent rien de mentir) en font fort bien leur prouffit, par ce qu'elle est prompte & agile à dõner plaisir & passe-temps à ceux qui l'a regardët. Donc ils la portent & pourmenent de ville en village, par les foires & marchez, afin d'assembler, & attirer le menu peuple à leurs singeries & mensonges, pour vëdre leurs faulses drogues esuentees, qu'ils disent auoir apportees des pays estranges & loingtains regions, ce que font tout ainsi les bateleurs & triacleurs d'heresie, qui sont les predicans du diable d'enfer, lesquels s'en vont par pays, avec leurs Gue-nons montees sur la croupe de leurs grãs cheuaux, disans mots de gueulle contre Dieu & ses saincts, donnant grand plaisir



aux auditeurs qui se delectent à leur douce eloquence & faulſe doctrine, dont ils trôpent & deçoient vne infinité de pauvre peuple, qui est fort facile à peruertir & corrompre, pour le plaisir qu'il prent à ouyr raconter choses recreatiues & nouvelles, suyuant le prophete Esaye, qui dit: *Loquimini nobis placentia.*

Il y a d'autres Singes domestiques & priuez, qui ne bougent de la maison, tousiours enchaynez par le col, treynant vne grosse boulle au bout de leur chayne, qui tourne deçà & là, & ne font autre chose que boire & manger, par lesquels nous sont figurez les Marmots heretiques couuers d'hypocrisie & simulation: Chrestiens avec les Chrestiens, & Huguenots avec les Huguenots, qui sont *nullius Religionis*, mais parfaicts Atheistes, roulans leur boule langagere de costé & d'autre, pour adherer & complaire aux seigneurs & dames selon la Religion qu'ils tiennent, de sorte que si monsieur est heretique, ils ne luy parleront que d'heresie & libelles difamatoires cõtre les gens d'Eglise, & si madame est Catholique & Chrestienne, ils ne luy tiendront autres propos que de la

vierge Marie, Saints & Saintes de paradis:& telle maniere de Singes priuez, sont beaucoup plus dangereux, que les forains & descouuers qui disent tout ce qu'ils ont dessus le cœur, au contraire des simulez, qui disent d'un & font d'autre, ayant tousiours (comme dict est) la boulle d'atheisme, qui les entrayne & faict tomber en eternelle damnation, & tous ceux qui les hantent & frequentent.

Les Guenons aussi ont vne longue queue, & sont merueilleusement chaudes & lubriques, comme sont aussi celles de ladicte derrision, qui ont ordinairement vne grand' troupe de Singes & Marmots à leur suyte & queue, semblable à celle du Dragon, de laquelle parle saint Iean en son Apocalypse chapitre douziesme, faisant tomber la tierce part des estoilles du ciel, ce qu'elles font par mesme moyen, attyrant à leur luxure & pail-lardise, vne infinité d'Apostats & Moynes reniez, qu'elles font tomber du firmament de l'Eglise en eternelle damnation, de sorte & maniere que les dictes Guenons, Huguenotes, attireront & diuertiront plus d'hommes en vne heure de nuict,

que ne sçauroiēt faire les Singes & Marmots en vn an, à raison de ladicte luxure & paillardise.

Outre plus le Singe ne veut ouyr parler del'Eglise, Quand le Bastelleur en faict ses ieux, & qu'il luy parle d'aller à la Messe, il rechine & claquette des dents, comme vn desesperé: mais quand on luy tient propos de la tauerne, lors il se resiouit, & faict dix mille soubressaulx. Ce que font aussi noz susdicts Singes & Marmots, qui ont en hayne mortelle l'Eglise de Dieu, & au contraire ayment la tauerne, pour le bon vin, qu'il leur faict faire mille singeries, & pour les bons & gras morceaux qu'ils ont en recommandation, aymanstrop mieux vn iour de bonne chere, que vne heure de ieusne & abstinence.

Et d'abōdant, le Singe est (comme dict auons) enchainé, & n'est en sa liberté d'aller où il veut, comme sont aussi les dessus dicts Singes heretiques, que le diable d'ēfer tient enchaynez, voire si fort qu'il n'y a Dieu ne Eglise qui les puisse deschainer ne retirer de ladicte singerie, tant sont liez & endurcis en leur erreur, ce qui les empesche de iouir de la liberté de conscien-

ce ſpirituelle pour aller où ils prétendent tous chauſſez & veſtus , avec leurdict lien qu'ils traynent touſiours apres eux.

Vne autre imperfection ont leſdicts Singes, c'eſt que tout auſſi toſt que leurs petis ſont nêz, ils les baiſent, accollêt & embraſſent ſi fort , que bien ſouuent ils les tuent & eſtouffent entre leurs bras, ce que font par meſme moyen ceux de noſtre nouuelle derrifion, leſquels font mourir tous les Marmots & guenons qu'ils engêdrent & enfantent en leurs adulteres de la foy, par blâdiſſemens, flateries & accolades , en maniere & façon , que de cent mille, à peine vn eſchappe-il de leurs ſingeries , qui ne ſoit eſtouffé & mis à mort, par le glaiue de leurs langues vulpines & meſchantes.

Ceſdictes beſtes ſont ſemblablement fort difficiles en leur boire & mâger, quelque bonne viande qu'on leur preſente: car ils ont ſi grand peur d'eſtre empoifonnez, que iamais n'en gouſtêt, que premierement ne la ſentent au nez , ce que font tout ainſi noſdicts Marmots & Guenons, qui doubtêt ſi fort de la reale manducation du corps de noſtre Sauueur Ieſus

Christ au fainct Sacremēt de l'autel, qu'ils veulent sentir & mesurer l'incapacité de leur entendement, à l'omnipotence de Dieu le createur, craignans d'estre trompez & deceuz de nostre mere faincte Eglise, qui les a engendrez en la foy sur les faincts fonts de baptesme, & nourris du pain de l'escriture, & de la chair de l'Aigneau immaculé en l'arbre de la Croix, lesquels malheureux diroient volontiers comme les Iuifz : *Si filius Dei es, descende de cruce*, aussi si tu es audict Sacrement, parle à nous, & te mōstre en chair & en os, que nous te voyons en publique presence, & alors n'aurons que dire, & croirons qu'il est ainsi.

Voyla ce que voudroient nosdicts Singes & Guenons, lesquels ne se conuertiroient pour cela, par ce qu'ils sont malades du peché de mort, duquel parle fainct Iean, disant: *Peccatum ad mortem non pro illo dico ut roget quis*, qui est (dict monfieur S. Augustin) *magnum secretum huius questionis.*

<i>Et pource Guenons</i>	<i>Pour conclusion</i>
<i>Qui auez voz noms</i>	<i>La fin sera telle,</i>
<i>Exaltez si haut</i>	<i>Que vous perirez</i>
<i>Que le sens vous faut.</i>	<i>Et vous en irez</i>



En damnation	Qui auez au corps
De mort eternelle.	Vne legion
C'est chose tresseure	De diables d'enfer.
Qu'en precessure seure	Parquoy nous disons
Sans aucun sejour	Contre voz raisons
Maudirez le iour	Qu'un homme est biẽ beste
Que fustes onc nez,	Se rompre la teste
Et serez damnez	Pour penser auoir
Par vostre heresie,	Par son grand sçauoir
Si vous n'amendez	Le dessus de vous:
En temps & en lieu	Car vous estes tous
Vostre infame vie,	Si charnels folastres,
Ne vous attendez	Et opiniastrés
De voir iamais Dieu.	En vostre heresie
Car Dieu tout parfait	Et meschante vie,
Auroit plus tost fait	Qu'il n'y a moyen
Vn monde nouueau	Qui serue de rien
Fondé dessus l'eau,	En cela, sinon
Qu'auoir conuertý	Ieusne & oraison,
Vn cœur peruertý,	Pour vous mettre hors
Comme vous rebelles	Les diables du corps:
Traistres infidelles	Ou bien sans cela,
De l'Eglise hors,	Vous laisser tous la
Sans religion	Et toutes voz sectes
Plus durs que le fer,	Pour tels que vous estes.

Or donc messieurs les Singes, puis que  
Singes vous estes, qui arguez le saint

Esprit de dormition & negligēce, disant, qu'il a celé & caché la verité à son Eglise, & qu'elle n'a esté congneue iusques à ce iourd'huy, que par le moyen de vous autres, qui l'auiez reuelec. Or pour l'honneur de Dieu, parlons ensemble par accord, & escoutōs les raisons les vns des autres, sans impatience ne colere, afin que par nostre propre iugement nous puissions congnostre & iuger qui a le droict ou tort de vous ou nous. Car il faut necessairement qu'il y ayt raison en vous, ou bien que soyiez du tout bestes & transportez d'entendement, & puis que ne voulez recevoir les saincts Canons & decrets de toute l'Eglise vniuerselle, & generaux concils, & que vous dictes auoir le saint Esprit. Il n'y a plus beau moyen d'abiurer voz erreurs que par ladicte raison naturelle, puis qu'autrement ne voulez croire ladicte Eglise Catholique & Romaine, & pource disputons par ladicte raison. Or quant au premier poinct, c'est vne regle generale que tout procez ne se peut iuger ne vuyder que par les loix & coustumes ou pluralité de voix, & puis que ne voulez croire voz peres ne vous arrester



ausdicts Conciles generaux, il faut selon  
ladicte raison, que nostre different soit  
vuydé par l'aduis & conseil de la plus  
grande & saine partie de tous les trespas-  
sez & viuans. Dont pour diffinir ce pre-  
mier point, nous requerons qu'ayez à  
nous produire, tous voz predecesseurs  
du temps passé heretiques comme vous,  
qui ont esté depuis la resurrection de no-  
stre sauueur Iesus Christ iusques à pre-  
sent. Voire & tous les Singes & Guenons  
qui vous ressemblent, & qui suyuent les  
traces & vestiges de vostre damnee der-  
rision. Et de nostre part amenerons  
tous les Apostres, Martyrs, Confesseurs,  
vierges, saincts, & sainctes de paradis, &  
tous les viuans & trespassez, qui seront  
cent mille tesmoings contre vous vn, &  
les peres & meres qui vous ont engédrez  
& nourris, du nombre & des premiers  
qui vous cōdamneront: Et si vous dictes  
que vous tenez totalement la loy des  
susdicts Apostres & nō autres, nous vous  
prouuons le contraire par leurs œuures  
mesmes, & par la vie que vous menez, la-  
quelle donne tesmoignage du contraire  
de ce que vous dictes & faictes, comme

pouuez voir aussi, par les liures des disciples qui les ont ensuyuis en leur conuersation & discipline reguliere, ainsi qu'il appert par les œuures d'un saint Clement disciple de saint Pierre, de saint Ignace disciple de saint Iean l'Euangeliste, de saint Irenee, saint Policarpe, & tous autres qui vous dementent & condamnent en leurs escriptures, qui nous ont laissees en perpetuelle memoire, & specialement saint Denis Areopagite disciple de saint Paul, lequel apporta la foy en France, & pria Dieu qu'il luy pleust la preseruer & garder audict Royaume: dont luy fut reuelé par l'Ange, que tant que iustice regneroit en iceluy, que l'Eglise prospereroit en la dicte foy, mais que si tost qu'elle deffaudroit, qu'elle s'en iroit hors, le pais. Ce que voyons appertement par la dormition & negligence de noz iuges & prelates, voire & qui portent plus de dommage & preiudice à la dicte Eglise de Dieu, que toutes les heresies & erreurs problematiques, que vous sçauriez alleguer ne proposer tous le temps de vostre vie: Car c'est vne chose certaine, que si nous eussions eu de

bons Euesques vigilans sur leurs troupeaux, & de bōs Iuges & Magistrats, pour exercer iustice entre vous & nous, long temps y a que vous fussiez exterminiez, mais tant que les superieurs dormiront en l'extirpation desdictes heresies, & qu'ils feront diuisez en leur conseil, comme les vns Catholiques & autres heretiques, iama<sup>s</sup> ledict Royaume ne prosperera en l'ainour & crainte de Dieu. Voyla quant au premier poinct, raison qui vous cōtre-dict & condamne. Secondemēt nous demandons qu'ayez à nous monst<sup>r</sup>er tous les liures de voz anciē<sup>s</sup> docteurs schismatiques, qui vous ont laissez en lumiere pour perpetuelle memoire, comme d'un Nicolaus, Symon Magus, d'un Arriē, d'un Manichien, d'un Vigilance, d'un Ieā Hus, & vne infinité d'autres meschā<sup>s</sup> voz semblables, qui ont esté avec leurs liures & les vns bruslez par arrest & sentēce des cours souueraines & saincts Cōciles generaux, veritablement vous n'en sçauriez auoir monst<sup>r</sup>é vne seule pance de a, cōme nous qui auons tous ceux des saincts Apostres & disciples de nostre sauueur Iesus Christ, cōme d'un saint Ignace disciple de saint

Iehan l'Euangeliste, d'un saint Clement disciple de saint Pierre, d'un S. Denis Areopagite, qui apporta la foy en France, & qui fut disciple de saint Paul, d'un S. Cyprien, aussi d'un saint Chrysostome, d'un saint Hierosime, d'un saint Augustin, saint Ambroise, saint Gregoire, & d'autres innumerables docteurs de nostre mere sainte Eglise, gens de bien & de bonne vie, qui se sont accordez & desquelz suiuiuis l'interpretatiō des saintes escriptures conforme à leur vie & doctrine, que nous auons receue de pere en filz iusques à ce iour d'huy.

Tiercement, raison vous dict, qu'ayez à regarder le different qu'il y a entre l'vnité de l'Eglise de Dieu & la vostre: car celle de Dieu n'a qu'un sens, qu'une loy, un Dieu, un baptesme, une foy, appelée la robe inconsutile, sans cousture, dont les filz n'excedent l'un l'autre: c'est à dire, que tous les enfans de nostre dicte Eglise, n'ont qu'une credence, & ne croient plus ne moins tous ensemble qu'un seul Chretien, qui est bien au contraire de la vostre diuisee en cent mille sectes & diuerses opinions, dont aucuns de vous sont Nicolaïtes,

colaïtes, tesmoings plusieurs de voz faux predicans qui ont espouſé deux ou trois femmes, les aurrés ſont Anabaptiſtes, Lutheriſtes, Caluiniſtes, & pour conſclusion la plus part Atteiſtes qui ont (comme on dict en cōmun prouerbe) autant de teſtes autant d'opinions, ainſi qu'il appert par les faux liures qu'ils ont compoſez, ou ils ſe contredifent & dementent l'un l'autre. D'auantage, auons a demander ou eſtoit voſtre Eglise maligne il y a cinquante ou ſoixante ans, & depuis quel temps elle a prins ſon origine & fondement? ſinon depuis Martin Luther enuoyé du diable d'enfer preparer les voyes & ſentiers de l'Antechriſt filz de perdition, ce qui n'eſt ainſi de la noſtre, mais au contraire qui ne tient ſa fondation & dedicace que de noſtre ſauueur Ieſus Chriſt comme nous teſmoignent les Euangelistes, canons & decrets de tous les ſaincts conciles generaux, n'ayant prins ſon authorité & puissance d'autre que de Dieu & de ſes Apoſtres eſquelz ont ſuccedé tous les Eueſques, prelats & pasteurs d'icelle iuſques à preſent ainſi que voyons par le Cathalogue des Papes, deſquels en y a eu trente



trois consecutis , qui ont prins & receuz couronne de martyr auant que ladicte Eglise ait esté en repoz de son premier labour.

Oultre plus, si nous regardons de quelle qualité sont voz Predicans & Ministres, tous Apostats & Moines reniez, sacrileges, larrons, voleurs, lubriques, & pailars, qui ont ietté le froc aux örties, pour donner lieu à leur charnelle concupiscence, & autres pources gens mechaniques, qui ne sçauēt Latin ne François, lesquels ont veu que noz Euesques & Prelats estoient occupez aux œuvres de la chair, & empeschez à faire la court aux dames, ayant trouué leurs sieges vuydes & vacans, ils se sont mis dedans, & prins possession de leurs lieux & places, & de leur propre autorité se sont intronisez en la prelatüre, de sorte qu'ils ont si bien ioué leur roulet, qu'ils ont esté receuz au lieu des susdicts Euesques, qui se sont (comme dict est) amusez à la moustarde par le deffaut des Roys & Princes de la terre, qui de puissance absolue, & contre droit ordinaire ont vsurpé, & vsurpent l'election du saint Esprit, ce qui cause la ruine de l'E-

glise de Dieu, dont ensuit vn dixain à ce propos :

*Au temps iadis l'Eglise estoit seruie  
Par gens de bien sans reprehension,  
Mais du depuis les princes par enuie  
Ont vsurpé sa sainte election,  
Et a regné charnelle affection,  
Dõt ce iourd'huy tous maux sont procedez,  
Et les pasteurs qui nous sont concedez  
Font tant d'abus, par promesses & dons,  
Que mieux vaudroit les élire à trois dez,  
Car au hazard se pourroient trouuer bons.*

Au reste, nous requerons qu'ayez à mon-  
strer les vestiges & remarques des Tem-  
ples & Eglises que voz predecesseurs he-  
retiques vous ont ediffiees & basties, &  
les lieux & places où ils ont exercé vostre  
damnee derrision, ce que ne sçauriez en  
iour de vostre vie, qui est vn argument  
inuincible contre vous, au contraire de  
nous, qui auons vne infinité de grans li-  
ures de pierre, c'est à dire de belles Egli-  
ses, que voz peres & les nostres, nous ont  
imprimez & basties, par toute l'vniuer-  
selle chrestienté, & chose trop plus que  
suffisante pour vous condamner & dam-  
ner, par sentence & arrest de ladicte rai-



son naturelle d'en voir tant de Cathedrales, Collegialles, Abbatialles, Parrochialles, & tant de beaux Monasteres & Conuens, que vous ne sçauriez que dire ne respondre à cela, voire & vne apparence manifeste que ce n'est que toute resuerie & abus des folles opinions que vous tenez, autrement faudroit dire, que nostre Seigneur auroit esté immisericordieux à son peuple, & le saint Esprit endormy en son Eglise iusques à ce iourd'huy, & d'auantage, estes vous plus sçauans que tous les anciens docteurs du temps passé, gens de sainte vie & conuersation? qui ont respâdu (aucuns d'eux) leur sang pour la verité qui nous ont esclarcie par reuelation spirituelle, au moyen de leurs bônes ceuures & vertus. Et pour l'honneur de Dieu, regardez quelle est la vostre vie au pris de celle qu'ils ont menee, ils ont ieuné en dignes fruiçts de penitence, & vous tousiours au contraire la pance pleine, ils ont esté chastes & pudiques, & vous lubriques & paillars adonnez à toute luxure & charnalité. Ils ont esté veritables en tout ce qu'ils ont dict & presché: & vous publiques mensongers ordinaires en voz

faulſes preſches & conciliabules plaines d'iniures & blaſphemes. O miſerables & malheureux reprouuez, ſi voz heresies auoient lieu, noſtre ſauueur Ieſus Chriſt auroit bien perdu ſon temps & ſa peine, & reſpandu ſon ſang en vain, ſil auoit caché la verité à ſadiſte Eglise, ſans l'auoir reuelee à noſdicts peres anciens, leſquels indubitablement ſeroient tous perdus & damnez : car vous ne nous ſçauriez nier, que toute perſonne qui meurt en idolatrie, ne ſoit damné. Or eſt-il ainſi que tous l'ont par viue foy adoré, receu & communiqué au ſainct Sacrement de l'autel, qui eſt le dernier morceau ſpirituel qu'on leur a donné & preſenté pour la remiſſion de leurs pechez à l'article de la mort, ce qu'ils ont auſſi creu & receu pour tel ſans aucune doubte ne diffidence, dont enſuiuroit qu'eſtans morts la deſſus (ſil eſtoit autrement) ils ſeroient morts en idolatrie, & finalement tous perdus & damnez, qui eſt vne regle de droit diuin & humain, & qui ne peut eſtre ſans blaſphemer la miſericorde de Dieu, & le merite de la mort & paſſion de ſa nature humaine : car il auroit (comme dict eſt) prins grand' peine

pour neant, d'auoir laiffé perdre & damner tous les trespassez depuis mil cinq cēs foixante & treze ans, & auoir caché ladicte verité à les saincts & sainctes de paradis, pour la reueler à vous miserables & meschans fagots d'espines, qui ne vallez que à brusler au feu d'eternelle damnation.

Outre toutes ces choses, regardons ie vous supplie, quel honneur & reuerence vous auez à la parolle de Dieu? de reiecter & abhorrer lesdictes eglises & lieux saints pour aller faire vosdictes presches & synodes, en des granges, estables, & tectz à pourceaux, par cela monstrez vous bien, que Dieu vous a du tout delaissez; & reprouuez de sens & entendement. Considérez d'auantage, quelles sont voz chansons Marotines, & quelle difference il y a entre voz chāps profanes, & nostre beau seruice diuin, qui se fait ordinairement par toute l'Eglise vniuerselle; & principalement és grādes festes solennelles, où vous voyez les autels tapissez & ornez, les belles chapes, chasubles, & autres riches ornemens de drap d'or & velous desployez, & outre-plus les grosses cloches sonner à

carrillon, le peuple congregeé en priere & deuotion, le luminaire brullant, l'encens respandu, le Clergé reueſtu, chanter matines à minuit par les Religions, prime, tierce, ſexte, nonne, Meſſe, Veſpres, Cōplies, tant de beaux reſpons, hymnes, cātiques, proſes, pſalmodies, & autres infinité de prieres & oraiſons. Reiecter toutes ces choſes ſainctes, pour receuoir (comme dit eſt) les chanſons d'vn ſolatre Marot, qu'il n'y a (par maniere de parler) q̄ trois iours qu'il eſt né, & dire aujourdhuy, tous mes peres ſont damnez, & moy ie ſuis homme de bien, tous ceux qui ont edifié & baſty les Eglifeſ ſont damnez, & moy qui les ay ſacrilegees, deſtruites, & ruinees, ie ſuis homme de bien. Et voyla *peccatum ad mortem*, pour lequel ne faut point prier, dit S. Iean, à raiſon de l'obſtination & durcité du cœur impenitent. Donc vous voyez apertement qu'eſtes ceux-là deſquels parle ledit Apoſtre en ſa premiere epiſtre, douxième chapitre, là où il dit que au dernier temps, pluſieurs faux Antechriſts ſeront produits de nous, & ne ſeront point des noſtres. Car ſils eſtoient des noſtres, ils demeureroient des noſtres, *ſed vt manife-*

*ſti ſint, quoniam non ſunt omnes ex nobis.* afin de manifefter qui ne ſont point de nous, ne de la congregation des eſleuz & predeſtinez de Dieu. Leſquelles parolles ſ'adreſſent proprement à vous, qui eſtes venus & yſſus de nous, non pas de nous quāt aux erreurs & blaſphemes que vous tenez, mais bien quant à la generation charnelle. Car ſi vous euſſiez eſté fermes & conſtans en la foy de voz peres, vous fuſſiez veritablement demourez avec nous, ce que Dieu n'a permis pour voſtre orgueil & ambition, & pour mōſtrer auſſi que vous n'eſtes des noſtres. Et voyla cōme ledit Apoſtre a prophetiſé voſtre dānation, par le refus que vous faiētes de la grace de dieu. Comme l'orgueilleux Pharaon, auquel tant plus Dieu luy enuoyoit de ſignes & perſecutions, & de tant plus reſiſtoit aux admonitions & aduertiffemens, que luy faiſoit le prophete Moyſe ſans iamais en faire ſon proufit, par meſme moyen les Scribes & Pharifiens, voyās reſſuſciter les morts à noſtre Seigneur, enluminer les aueugles, & faire vne infinité d'autres pluſieurs miracles, ne ſ'en cōuertirent non plus que deuant, Malchus auſſi  
qui



qui eut l'oreille coupee, qui estoit assez pour conuertir cent millions de mondes, n'en fut meilleur ne plus homme de biẽ. A la prise de nostre Seigneur les susdicts Iuifz tomberent vne fois deux fois à la reuerle pour leur monstrier que fil eust cõ-mãdẽ à la terre de s'ouuir, qu'elle les eust angloutis comme Coré, Dathan & Abiron, pour tout cela ne s'en conuertirẽt iamais, vous aussi malades de la maladie du diable, qui est ambition, pour aucune determination de Concile, ne probation de verité, ne abiurerez voz faultes & erreurs, par ce que vous estes malades de la maladie chancreuse de laquelle parle mōsieur sainct Paul à Timothee 2. epistre chap. 2. disant que, *Multũ proficiunt ad impietatem & sermo eorum, vt cancer serpit*, qui est proprement vn, *Noli me tangere*, qui vous mene tous à la mort, signe manifeste, que depuis qu'un homme regibe aux inspirations du sainct Esprit, & que sa propre cõscience contreuient du tout aux iugemẽs de raison, il n'y a point de faulte que cestẽ personne là est enuoyé de damnation. Comme vous superbes & orgueilleux, qui vous estimez & presumez estre plus sages



& ſçauans que tous les ſaincts & ſainctes de paradis, qui nous ont baillé de pere en fils tout ce que nous croyons & tenõs de l'Egliſe Apoſtolique & Romaine, de laquelle deſpédēt tous les articles de noſtre foy, cõfirmez par infinis miracles & preuues ſuffiſantes, pour vous cõfondre & enuoyer en eternelle damnation, ſi Dieu ne vous faiet la grace de vous humilier & recongnoiſtre voz faultes & erreurs.

Encore vn autre point y a, c'eſt que noſtre dicte Egliſe, a eſté preſchee & anoncée par tous les confins de la terre vniuerſelle, ainſi qu'il eſt eſcrit, *In omnem terrā exiuit ſonus eorum*, iuſques és païs des Sarafins & payens, & principalement en Turquie, Surie & Arabie, & autres nations barbares & eſtranges, eſquelles n'y a prouince qui ne ſe reſſente du ſacrifice de la Meſſe, & qui ne permette la celebration d'icelle, au milieu de ſes païs & contrees, ſuyuant la prophetie de Malachiel, qui diēt: *Ab ortu ſolis vſque ad occaſum magnum eſt nomen meum in gentibus, & in omni loco ſacrificatur & offertur nomini meo oblatio munda*, comme l'on peut voir dans l'Egliſe du ſainct ſepulchre noſtre

Seigneur en Hierusalem , où sont plusieurs religieux de diuerſes nations , ſçauoir eſt , Latins , Grecs , Armeniens , & autres appelez Chreſtiens de la ceinture, les autres Iacobites , Indiens qui ſont de la terre du preſtre Iean : Georgiens & Neſtoriens, qui tous ont chacun leur chapelle dans ledict ſainct Sepulchre , où ils chantent & celebrēt la Meſſe & les heures Canoniales comme nous , reſte qu'ils different en quelques ceremonies les vns des autres, & principalement des noſtres, & ſont les dictes nations nourris & entretenus de leurs païs, ce qui nous mōſtre appertement noſtre dicte eglise eſtre vniuerſelle , ainſi qu'auons peu voir audict lieu, ou n'en auons trouuē aucune remarque ne veſtige de Huguenots , par ce qu'elle ne faiēt que commencer à preſcher & publier ſa nouuelle derrifion & infection Theodobezienne, contre tout fondement & authorité de la ſaincte, eſcriture, ſur lequel poinēt auons à demander, quand viendra le temps qu'elle ſera receue & annōcec, par tout le mōde, cōme celle de Ieſus Chriſt qui la dites eſtre voſtre , & qui eſtes du tout contrarians,

ennemis & aduersaires d'icelle: veritablement ce ne sera iamais, à grād peine scauroit-elle estre vniuerselle, qu'elle ne fut iamais preschee que dessouz la cheminee, sinon vn petit de temps que Iustice a callé le voëlle à Dieu & sa conscience, dont ensuit vn dixain à ce propos:

*Veut tant d'arrestz qui ont esté donnez  
Du saint Esprit, contre les Scismatiques,  
Est'ahy suis, comme entre vous damnez  
Osez parler deuant les Catholiques,  
En voz sermons d'erreurs problematiques  
Où pauvres gens sont trompez & deceuz  
Debuez vous estre escoutez & receuz?  
La loy de Dieu dict que non de sa part  
Et qu'on ne doibt s'arrester la dessus  
Par ce que tous estes venus trop tard:*

Aussi estes vous veritablement, pour estre receuz en procez, & pour nous donner nouuelles loix & ordonnances, contre toute la determination de ladiète Eglise vniuerselle & saincts Conciles generaux, suivant les decrets & Canons des Apostres, qui ont esté enuoyez de Dieu, & vous du diable d'enfer, pour prescher & annoncer l'aduènement de l'Antechrist. Car les susdicts Apostres sont ve-

nus(comme dict auons ) en ieufne , abstinence & mortificatiō de la chair,& vous en gourmandise & ebriété. Ils sont venus en toute humilité, obediēce, continence & chasteté, & vous en orgueil, ambition, luxure & paillardise. Ils ont renoncé femme & enfans pour suyure Iesus Christ, & vous pour en espouser autant qu'il vous plaist, comme plusieurs de voz faux Ministres & Predicans qui en ont deux ou trois. Ils ont donné tous leurs biens & possessions aux pauvres, & vous au cōtraire, pillez & desrobez les thresors de l'Eglise, & ruynez tout le monde iusques aux pources laboureux des champs, disant que c'est vſance de guerre, & que tous biens sont communs. Ils ont fondé lesdictes Eglises, tant materielles que spirituelles à l'honneur de Dieu & de ses saints, & vous ruynez les consciences & fondemens d'icelles, en blasphemant le throne & l'aigneau avec contemnement & mespris des susdicts saints & saintes de paradis. Ils sont venus en mourant pour le nom de Iesus Christ, & vous venus en tuant & massacrant les successeurs des susdicts Apostres, qui sont les Pa-

steurs & gens d'Eglise que vous avez occis & tuez. Ils ont reprins & redargué les vices, & vous les autorisez & en faictes vertu, iusques à donner planiere remission à ceux qui micux pilleront & destorberont le pource peuple, sans auoir aucun esgard à pource ne à riche, vous nous reprenez de quatre ou cinq solz que donnons aux gens d'Eglise pour dire Messe, suiuant la doctrine de sainct Paul, qui dict: que qui sert à l'autel, doit viure de l'autel, par charité & aumosne ordonnee pour leur vie & substantiation, & vous miserables & malheureux, ne plaiguez vn chacun de vous, deux ou trois elcuz par sepmaine à voz faulx Ministres & Predicans de menfonges, pour nourrir leurs concubines & paillardes, lesquels au lieu de seruir audict Autel, seruent à la chaire de pestilence pour vous infecter & administrer le pain d'amertume & douleur, tesmoings plusieurs qui se sont retirez de vostre derision, pour la grosse despense qu'il leur conuenoit faire & fournir gros deniers, en quoy ils estoient taxez & contraincts par voz Eglises malignes, au contraire des nostres, où nul n'est forcé de



donner sinon à sa deuotion, & rien fil ne veult. Oultre plus vous dementez nostre Seigneur qui vous dict affirmatiuement, que la substāce du pain & du vin est conuertie en son precieux corps & sang au saint Sacrement de l'autel, & vous negatiuement dictes que non, de sorte que estes semblables aux Iuifz incredules, qui luy disoient en l'arbre de la croix : *Si filius Dei es, descēde de cruce*, Vous aussi voudriez volontiers, si tu es audict Sacrement, monstre toy visible en chair & en os que nous te voyons, & qu'en mangeant ta chair, elle nous donne le goust d'une perdrix, chappons ou beccacc, selon nostre appetit desordonné, comme faisoit la manne aux enfans d'Israel, voyla ce que vous miserables & malheureux, voudriez que Dieu vous fist.

Vn autre argument proposons contre vostre Singerie, fondé sur la loy de Dieu, qui n'apporte iamais que paix, au contraire de vostre damnee derrision, qui nous a tant produit & engendré de douleurs, qu'elle a rendu nostre poure Royaume vn des plus poures & desolez Royaumes de tout le mōde & pour l'hōneur de



Dieu cōsiderez & regardez de cōbien elle a apourie & amoindrie de force & puissance, combien elle a destruiēt, pillé, desrobé & rançonné de pources marchans & laboureurs champestres? combien elle a sacrilegé ruyné & rasé à fleur de terre, d'Eglises, Monasteres & Conuens? tant & à si grand nombre que tous les Rois Chrestiens ne sçauroient de cent ans reparer ne referer le beau mesnage qu'elle a faiēt. Considerez d'auantage combien son glaïue sanguinaire a respādu de sang & executé de furies & cruauitez és personnes des gēs d'Eglises & autres princes & grās seigneurs iusque à leur couper les oreilles, les embrocher tous vifs & rostir à petit feu. O Dieu helas, miserables & malheureux qui vous diētes Chrestiens & de l'Eglise reformee, les Apostres vous ont ils monstéré cela? Helas tant s'en faut, qu'au contraire ils ont trop mieux aymé mourir que se deffendre, donc considerez toutes ces choses, & combien sont morts d'autres de basse humanité, veritablement plus de cent & cent mille tant Catholiques que heretiques. Considerez par mesme moyen combiē de pources ames damnees

damnees, il y a entre les occis & tuez, he-  
las tant & tant qui n'est langue d'homme  
qui le sceust dire ne penser, & oultre plus  
confiderez combien elle a faict de fem-  
mes veufues, orphelins, & prostitue de  
poures filles comme impudiques de  
bordeau, combien elle a faict mourir de  
poures gens de faim, combien elle a en-  
gendré de troubles, guerres, noises &  
discors entre le pere & fils, iusque à tuer  
l'un l'autre sans respecter en rien la con-  
sanguinité paternelle, *O sancte Deus*, quel-  
les abominations. Veritablement vous  
monstrez bien par voz œuvres qu'estes  
possedez du diable d'enfer : Car la loy  
de Dieu (comme dict auons) n'apporte  
iamais que paix, amour & vnion entre  
les vns les autres, & ne commande de  
prendre les armes cōtre son prince & son  
prochain, ne tuer, piller, ne desrober les  
cheuaux des poures laboureurs, qui sont  
contraincts de quieter leur labeur pour  
cuiten voz cruautez & persecutions, ce  
qui nous cause vne charté de pain & vin  
par tout le Royaume de Frācc, & si Dieu  
ne rabaisse vostre orgueil & ambition,  
par amendement de vie. Il faudra neces-  
sairement dorenauant que messieurs les

nobles abandonnent leur noblesse & les bourgeois & marchans, le trafic de marchandise pour labourer leur terres fils veulent manger du pain, par ce que les susdits laboureurs, ne peuvent plus fournir à l'appoinctement des bandolliers & meschans qui leur emportent tout, voire de sorte que ce iourd'huy la tierce partie des terres est demeuree en desert & friche pour les larrecins & volleries des diables deschainez par les champs, qui librement sans aucune crainte ne reprehension de iustice prennent & pillent tout ce qu'ils peuvent emporter. Helas: pources meschans, helas, & ne voyez vous que par vostre malheureuse derrisiõ tout est destruit & perdu, ne voyez vous que manifestement l'ire de Dieu est respan due sur nostre dict Royaume? & que *Terra plena est iudicio sanguinum & maledicta propter præuarcationẽ*? Cõsiderez d'auãtage, quel temps il couroit, quel bon viure il faisoit au parauant vostre derrision, lors que voz peres & les nostres seruoieñt Dieu & ses saincts, bien a predict le prophete Ieremie chapitre neufiesme, parlãt de vostre singerie disant, *Quia derelinquerunt legem meam, & non ambulauerunt in ea,*

*ego cibabo populum istum absinthio* : ce que nous auons veu ceste annee presente estre accompli enuers vous & nous , pour vn presage & commencement de bien plus grandes douleurs à l'aduenir, si vous n'amendez voz erreurs & blasphemés, & nous tous noz execrables pechez, qui prouoquent son ire & fureur sur nostredict Royaume, ainsi que pouuez cognoistre, si vous n'estes du tout bestes ou trāsportez d'entendement. Dont pour fin & conclusion de ce discours, apres auoir eu l'oppinion & conseil de tous noz bons peres & anciens docteurs de l'Eglise vniuerselle, & veu aussi les decretz & sensurres ecclesiastiques, de tous les saincts Cōciles generaux, cōgregez & assemblez au consistoire & conclaue du saint Esprit. Raison naturelle vous a deboutez & deboute de toutes voz Singeries & faulses propositions d'erreur, & par mesme moyen condamnez & condamne par arrest & sentence de tous viuans & trespassés d'estre eternellement perdus & damnez, si Dieu ne vous faiēt la grace de recognoistre voz fautes & pechez: lequel supplions par sa miseticorde estre plus tost aujourd'huy que demain, Amen.

ADMONITION ET AD-  
VERTISSEMENT A TOVS  
vrais fideles & Catholiques de batail-  
ler vertueusement contre lesdicts Sin-  
ges, Marmots, & Guenons, & reiecter  
leurs singeries & risees.



*L'assaut, à l'assaut fideles  
Pour la defence de la foy,  
Contre tous les Singes rebelles  
Ennemis de Dieu & du Roy.*

*Tout peuple de France arme toy,  
Tost, tost, à l'assaut, à l'assaut,  
Tu auras ayde de la haut  
Et secours de toute prouince,  
C'est à ceste heure qu'il te faut  
Mourir pour Dieu & pour ton Prince,*

*A l'arme, à l'arme populaire  
Contre les Marmots & Guenons,  
En ce temps de sang & cholaire  
L'Eglise de Dieu soustenons,  
La Loy de noz peres tenons  
Sans auoir crainte de leurs coups,  
Ce n'est rien d'eux au pris de nous,  
Soyons ensemble raliez,  
Et Dieu nous les rengerà tous  
Soubz la scabelle de noz piedz.*



Allons, marchons au deuant d'eux  
 Et portons le glaive en la main,  
 Pour debeller les malheureux  
 Qui nous font encherir le pain.  
 Ils nous feront mourir de faim  
 Si on ne leur donne bataille,  
 Et pource que chacun y aille:  
 Car sont gens de nulle valeur,  
 Qui sous faulx pretexte & couleur  
 D'abolir tous impostz & tailles,  
 Nous font manger pain de douleur  
 Qui nous transperce les entrailles.

Ils ont rendu nostre Royaume  
 Tant poure & indigent de blé  
 Qu'ils n'y ont laissé que le chaume  
 Dont tout le monde est fort troublé,  
 De toutes pars ont assemblé  
 Bandoliers qui n'ont point de nom,  
 D'auctorité, ne de surnom,  
 Lesquels sous couleur de subsides  
 Ne vivent (comme ont le renom)  
 Que de larcins & homicides.

Et pource commune de France  
 Desborde tous tes platx païs,  
 Afin qu'en ayons la vengeance  
 Sans estre folz, ne esbaïs.  
 Pourueu que ne soyons trahis,



# LA SINGERIE

Et qu'il n'y ait point de Iudas,  
 Dieu nous les rengera si bas  
 (Moyennant ses graces diuines)  
 Que de tous eux n'y aura pas  
 Pour les souillons de noz cuysines.

Que tout le monde donc aduise  
 De viure & mourir d'un cœur franc  
 Pour la defence de l'Eglise  
 Sans espargner escu ne franc,  
 Car ceux qui respandront leur sang  
 Sont assurez que Dieu leur donne  
 De leurs pechez remission  
 Et pource que nul ne sestonne  
 De leur preuarication.

Les schismatiques miserables  
 Enfans de reprobation,  
 Ont faict des choses que les diables  
 Ont en abomination,  
 Qui est vne punition  
 Prouenant de la main de Dieu,  
 Qui nous veult tous punir au lieu  
 Des malheureux qui ont forfait,  
 Et qui font guerre à sang & feu  
 Pour le pardon qu'on leur a faict.

Las où sont les gens d'apparence  
 Du temps de benediction,  
 Qui auoient tous leur conscience

En grand' recommandation?  
Gens de representation  
Qui faisoient en toutes prouinces  
Par leur graue expedition  
Trembler tous les seigneurs & princes.

Pour accorder & satisfaire  
A toutes n<sup>ost</sup>res humbles requestes,  
Et y auoit-il tant affaire  
A couper trois ou quatre testes?  
Pour obseruer ieusnes & festes  
Et faire mourir les meschans,  
N'auions nous point assez d'enquestes  
Contre eux, en la ville & aux champs?

Et ouy, de par Dieu, ouy,  
Nous en auions trop voirement,  
Mais le conseil n'a pas ouy  
Les hommes de bon iugement:  
Toutesfois, par amendement  
Que maintenant toute personne  
Ses biens & sa vie abandonne  
Sans auoir d'eux aucun remort:  
Car Dieu ne veult point qu'on pardonne  
A ceux qui sont dignes de mort.

Au vieil testament il en a  
Puny des Roys bien aigrement,  
Comme Saül, qui pardonna  
Au Roy Agag legerement,

Il en fut reprins tellement  
Que par l'ordonnance de Dieu,  
Dauid fut solennellement  
Sacré Roy & mis en son lieu.

Semblablement le Roy Achab  
Faisant guerre à ses ennemis  
Receut à mercy Benadab  
Que Dieu auoit en sa main mis,  
Pour le crime & peché commis  
Il luy fut dict par le Prophete,  
Ton ame coupable & infecte  
Sera pour celle du Payen  
Pour la grace que luy as faicte,  
Et tout ton peuple pour le sien.

Donc si nous auons bonne enuie  
De viure & regner longuement,  
Gardons nous bien sur nostre vie  
De differer leur iugement,  
Et suyuant le commandement  
De Dieu qui hait tels malheureux,  
Procedons vertueusement  
Que ne soyons punis pour eux.

Car pour certain asseurons nous  
Que si nous pardonnons au moindre,  
Dieu nous exterminera tous  
Sans auoir cause de nous plaindre.  
Ce qui est, grandement à craindre.

*Car nous sçauons bien, sans doubtaunce  
Que nous n'auons nulle puissance  
Ne autorité tant soit digne,  
De pardonner aucun offense  
De leze majesté diuine.*

*Pource messieurs les Roys & Princes,  
Si vous voulez regner & viure,  
Purgez voz pais & prouinces  
Des malheureux que Dieu vous liure,  
Croyez le conseil de ce liure  
Sans pardon aux plus grans donner,  
Faiçtes leur chef exterminer  
Qui vostre Royaume despeuple:  
Car vous ne pouuez pardonner  
L'interest de Dieu ne du peuple.*

*Tant que vous en souffrirez vn  
Pres de vous, ne en autre lieu,  
C'est vn final arrest commun  
Que vous n'aurez la paix de Dieu.  
Et pource, ralumez le feu  
Pour tous ceux qui en sont infectz:  
Car s'ils ne sont prins & deffaictz  
Par arrest de voz presidens,  
Autant possible est d'auoir paix  
Que d'arracher la Lune aux dents.*

*Et pource commune Chrestienne  
Pri Dieu avec tous tes amis,*

LA SINGERIE

Que par sa grace il te soustienne  
 Le bras, contre tes ennemis,  
 Lesquels tu vois campe & mis  
 Pres de tes portes & rampars,  
 Iecte toy sur les gros pendars  
 Et les va chercher iusqu'au lieu,  
 Considerant en toute pars  
 Que la victoire vient de Dieu.

Si tu auois tel cueur qu'ils ont  
 A soustenir leur loy fardee,  
 Tous tant de belistres qui sont  
 N'oseroient t'auoir regardee,  
 Iusques icy Dieu t'a gardée  
 Et te gardera si luy plaist,  
 Mais grandement il luy desplaist  
 De te voir si molle & couarde,  
 Attendu qu'il est tousiours prest  
 De faire pour toy l'auantgarde.

Ne peneses pas que tu estanches  
 Le sang humain de ta maison,  
 Des vertes fueilles & des branches  
 De la croix, par seule oraison,  
 Et dire Dieu est bon, c'est mon,  
 Et fort pitoyable de soy,  
 Mais il veult qu'on garde sa loy,  
 Et qu'on n'y faille d'un seul poinct,  
 Car combien qu'il t'ait faict sans toy,

*Sans toy, ne te sauuera point.*

*Or ne laboure point la terre  
Pour voir si le blé y viendra,  
Et ne te deffens à la guerre  
Sçauoir si Dieu te deffendra,  
Et si les armes il prendra  
Pour toy, sans que tu te deffendes?  
Non: car il fault que tu entendes  
Que combien qu'il ait le pouuoir,  
Il ne veult point que tu t'attendes  
A luy, sans faire ton debuoir.*

*Et sil est pour toy, que crains tu?  
As tu peur de mourir pour viure,  
Et d'auoir le cueur abbatu  
A l'assault que Sathan te liure?  
Non, non, mais sois prompte & deliure  
Contre les grans rebellions  
Des Singes, Marmots, & Guenons  
A soustenir ta foy promise:  
Car il veult que nous employons  
Tout nostre sang pour son Eglise.*

*Combien qu'ils soient par mons & vaulx  
A resspandre & iecter leur feu,  
Les crains tu plus sur leurs cheuaulx  
Que la main du glauiue de Dieu?  
Quand ils seroient tous au milieu  
De Paris (où Dieu est placé)*



Voire, & qu'ils auroient amassé  
Tous les grans diables à leur suite,  
Il ne faudroit qu'un pot cassé  
Pour leur bailler à tous la fuite.

Et bref, depuis que terre est terre,  
On ne vit tant de maux venir,  
Ne de famine, peste & guerre  
Qui s'en presente à l'aduenir,  
Dont de parler ne puis tenir  
Ma langue ligere & hardie,  
Et faut Chrestiens que ie vous die  
Qu'aurons encor de grand torment,  
Parce qu'en nostre maladie  
Il n'y a point d'amendement.

Les larrons ennemis de France  
Ont fort bien sceu ouurir la guerre,  
Mais la paix est hors leur puissance,  
Car c'est Dieu qui l'a forge & ferre,  
Leur paix est vne paix de terre,  
Vne paix de sedition,  
Vne paix de damnation,  
Vne paix de traistres infames,  
Qui cause la perdition  
De cinq cens mille poures ames.  
Arrestez se sont aux charongnes  
Comme gens enragez de faim,  
Et ont tous laissé leurs besongnes

Pour prescher l'Euangile en vain,  
Et en cuidant couper du pain  
De l'escripture pour leur viure,  
Leur propre sens ont voulu suiure,  
Mais iamais n'ont eu la puissance  
De bien sçauoir ouurir le liure  
Pour en tirer quelque substance.

Car la chair d'un beuf de charuë  
Ne fut iamais si aspre & rude  
Qu'est la sainte escriture crüe  
A ceux qui n'ont hanté l'estude,  
Et fault vne grand' promptitude  
D'esprit, à celui qui la voit,  
Et neantmoins on ne sçauroit  
Faire entendre à gens ignorans,  
Qu'en tout & par tout el ne soit  
Facile aux petis comme aux grans.

Et pour ce ces meschans gens la  
Vont lire de Dieu prouoquant,  
Et si coquin d'entre eux n'y a  
Qui ne se face predicant,  
Voire & ministre quant & quant,  
Ce que nul d'eux ne peut nier,  
Faire un predicant d'un meufnier,  
De faiseurs de brides à veaux,  
D'un rauaudeur, d'un cordonnier,  
Et d'escorcheurs de vieux cheuaux.

## LA SINGERIE

Tous les premiers qui commencerent  
 Furent les Cardeurs de Meaux,  
 Qui la singerie annoncerent  
 Par les tauernes & bordeaux,  
 De sorte que les macquereaux  
 En infecterent tant la ville,  
 Qu'ils en gasterent plus de mille;  
 Dont plusieurs villes & villages  
 Ont eu pour prescher l'Euangile  
 Tels ou semblables personnages.

Voyla noz beaux prescheurs modernes,  
 Noz predicans & vrais ministres  
 Des susdits bordeaux & tauernes  
 Qui ont acquis de fort beaux tiltres,  
 Des coquins, maraux & belistres,  
 Volleurs, sacrileges, brigans,  
 Rufiens, paillars, arrogans,  
 Plus endurcis que n'est le fer,  
 Tous membres pourris & puans  
 Gouvernez du diable d'enfer.

Les miserables mechaniques  
 Ont veu qu'aux bons & gras morceaux  
 Les Pasteurs ecclesiastiques  
 S'amusoient comme les pourceaux,  
 Et ce pendant que les gros veaux  
 Dormoient au liect de vanité  
 Les gueus ont par subtilité

Prins leur lieux & sieges vacans,  
Et de leur propre autorité  
Se sont ordonnez predicans.

Après se sont mis a tuer  
Les prestres pour auoir leurs hardes,  
A battre & à prostituer  
Leurs propre seurs comme paillardes,  
L'Eglise ont à coups de bombardes  
Reformee, à sacrileger,  
Reformee à tout saccager,  
Comme meschans membres pourris,  
Et reformee à esgorger  
Leurs peres qui les ont nourris.

Reformee à tyranniser  
Les Moynes par grand cruauté,  
Et reformee à diuiser  
Le prince & sa principauté,  
A blasphemer la papauté  
Et à raser à fleur de terre  
Toutes les Eglises saint Pierre  
Pour faire vne nouvelle loy,  
Et reformee à faire guerre  
Contre Dieu, & contre leur Roy.

Reformee à piller & prendre  
Les biens d'autruy furtiuement,  
Et reformee à faire pendre  
Les Conseillers de Parlement,

LA SINGERIE

Dont de ce trouble vehement  
 La commune est toute estonnee,  
 Et voyla l'Eglise damnee  
 L'Eglise de guerre & de mort,  
 De Dieu mauldicte & condamnee  
 Et le beau bien qui d'elle sort.

Reformee au profond d'enfer  
 De tous malins esprits formee,  
 Pour Sathanas & Lucifer  
 Construiete & à eux conformee,  
 Voire, & par voye difformee  
 Presenter requeste humblement,  
 Disant supply benignement,  
 La sainte Eglise reformee  
 D'auoir vniuersellement  
 Les presches, en ville fermee.

C'est comme si vne putain  
 Disoit supplye vne pucelle,  
 Qui gaigne en luxure son pain  
 Assise au bordeau sur sa selle,  
 Ladicte requeste estoit telle  
 (Selon que le commun bruiet court)  
 Dont nous semble aduis que la court  
 Les debuoit faire sans enqueste,  
 Pendre & estrangler hault & court  
 Avec leur predicte requeste.

Or comme loups desesperez

Congnoissent

Congnoissent bien que leurs forfaitz  
Ne peuuent estre reparez  
Pour raison de leurs grans meffaietz,  
Car leur pechez sont tant infectz  
Et deuant Dieu si treshorribles  
Que les tormens les plus penibles  
Qu'on scauroit au monde inuenter;  
Ne sont suffisans ne penibles  
Pour les punir & tormenter.

L'air demande à les estouffer,  
La terre à les reduire en cendre,  
Le feu à les ardre en enfer,  
Iustice à les faire tous pendre,  
Leurs pechez à la mort les rendre,  
Et les grans Ondes de la mer  
A les noyer & abismer,  
Le vent à les reduire en pouldre,  
Et le diable à les enfermer  
Es lieux de tempeste & de fouldre.

Les creatures insensibles  
Pierres, boys & tous animaux,  
A haulte voix & cris horribles  
Se plaignent à Dieu de leurs maux,  
Tous chemins, riuieres & eaux  
Qui sortent des vaines de pierre  
Demandent la vengeance & guerre,  
Et en grande exclamation  
Tous ceux du ciel & de la terre



Tremblent de leur damnation.

Et pource qu'ils sçauent fort bien  
Que peché en enfer les liure,  
Et qu'ils ont perdu tout leur bien  
Ils ayment mieux mourir que viure,  
Et leur damnation poursuiure  
Par vn desespoir qui les presse,  
Et qui tant fort offense & blesse  
L'honneur de Dieu & de leur race,  
Qu'en eux n'y a plus de noblesse  
Ne d'esperance d'auoir grace.

Non, à ceulx qui sont obstinez  
En leur erreur & nonchalance,  
Et contre leur Roy mutinez  
Sans recongnoistre leur offense,  
Dont en memoire & souuenance  
Des grans pechez qu'ils ont commis,  
Ils doibuent tous estre demis  
De leur noblesse, & declarez  
Vilains, Routuriers, ennemis,  
Sans iamais estre reparez.

Voire & confisquer tous leurs biens  
Et leur bailier vn tombereau,  
Pour charger l'ordure & fiens  
Ou les deliurer au bourreau  
Tous restus de gros bureau,  
Et au lieu d'esprons & botes  
Porter des sabots pleins de crotes,

Et pour leur viure leur bailler  
De l'eau, des oignons & des croustes,  
Et les enuoyer trauailler.

Au lieu de l'espee vne houë,  
Et estre tout au long du iour  
Iusques à my iambe en la bouë  
A labourer sans nul seiour,  
Et ne coucher à leur retour  
Que dessus vn petit de paille,  
Payer comme vilains la taille  
Au Roy, qui iustice maintient,  
Et gagner leur pain maille à maille  
Voyla ce qui leur appartient.

Et pour leur miserable vie  
Au lieu de peface d'honneur,  
Leur faire honte & vilennie  
Reproche, iniure & deshonneur,  
Comme meschans & faulx en cueur  
Qui ont aporté des douleurs,  
Et plus de larmes & de pleurs  
En France, par leur trouble & guerre,  
Que tous les larrons & volleurs  
Qui furent iamais sur la terre,

Or nous auons tant abusé  
De l'estat ecclesiastique  
Et du bien de Dieu mal vsé  
Que la faulte est toute publique,  
Ce qui faiët parler l'heretique

Et fonder dessus son erreur,  
 Dont contraignons nostre Seigneur  
 Par nostre abomination,  
 De nous punir à la rigueur  
 Faulte de reformation.

A ceste cause ie vous prie  
 Messieurs les Pasteurs venerables,  
 Appaisez le peuple qui crie  
 Sur voz meffaicts inexcusables,  
 Plorez voz pechez execrables,  
 Plorez voz grandes symonies,  
 Voz abus & querimonies  
 Esquelles auez donné lieu,  
 Et les offenses infinies  
 Qu'auez commises contre Dieu.

Plorez dessus voz auarices  
 Sur voz abominations,  
 Sur voz marchez de benefices  
 Par faulses dispensations,  
 Sur voz preuarications  
 Plorez, souspirez, gemissez,  
 Et de peur que ne perissiez  
 Plustost au iourd'huy que demain  
 Le pain des poures vomissiez  
 Que vous laissiez mourir de faim.

En ce temps de mortelle guerre  
 Plorez voz lieux sacrez deffaictz,  
 Qui sont rasez à fleur de terre

Pour voz pechez & grans forfaitz,  
 Plorez deuant Dieu voz meffaietz  
 Qui sont en si grande abondance  
 Que la terre n'a la puissance  
 De les pouuoir plus soustenir,  
 Et fault pour la perseuerance  
 Que Dieu soit contrainct vous punir.

De cendre emplissez le bissac  
 Et sans dissimulation,  
 Couchez vous tous dessus le sac  
 En plorant par compassion,  
 L'offertoire & oblation  
 Du corps & sang de Iesus Christ,  
 Que les faux suppost d'Antechrist  
 Ont deffaiet inhumainement,  
 Selon que nous dict & escript  
 Daniel, au vieil testament.

Souspirez, lamentez, pleurez,  
 Criez à Dieu misericorde,  
 Et l'ayde des sainctz implorez  
 En ce temps que tout se desborde,  
 Tous d'un amour, paix & concorde  
 Priez qu'à son peuple pardonne  
 Et que la paix & grace donne  
 A nostre Royaume de France,  
 Et que tout le monde s'addonne  
 A faire aumosne & penitence.

Plorez Religieux profez

# LA SINGERIE

Et vierges sanctimoniales,  
 De cueur pudique humble & confez  
 Plorez vos pechez ors & sales,  
 Dedans vos clostures claustralles  
 Vos vœux solennels obseruez,  
 Ieusnez priez, & Dieu seruez  
 Songneusement toutes & tous:  
 Car en vostre endroiect vous auez  
 Offensé aussi bien que nous.

Tous ceulx qui sont aujourdhuy Roys  
 Mouront demain (dict l'escripture)  
 Et seront reduis vne foys  
 En fetulence & pourriture,  
 Donc princes de bonne nature  
 Qui auez l'espee empoingnee,  
 Que la foy soit en vous congneue,  
 Et reconnoissez en tout lieu  
 Que n'estes tous qu'une poignee  
 De pouldre & cendre deuant Dieu.

Plorez messieurs les Roys & Princes  
 Les pechez enormes qui sont  
 Tans grans par toutes vos prouinces  
 Que esbahy suis que tout ne fond,  
 Et des blasphemes qui se font  
 Contre Dieu par sang & par mort,  
 Faiçtes iustice par accord  
 Et les meschans exterminer;  
 Car vn Roy tant soit grand & fort

Ne peut sans iustice regner.

Et vous aussi iuges du monde  
Qui auez vers le prince accez,  
Faiçtes punir l'orgueil immunde  
Superfluitez & excez,  
Abregez tous les longs procez  
Et vous gardez bien d'auarice,  
Faiçtes la iustice, iustice  
Desgrans blasphemes execrables,  
Desquels & de tout autre vice  
Deuant Dieu serez responsables.

Et pour ce plorez le default  
Qui peut venir de vostre main,  
En considerant qu'il vous fault  
Mourir ce iourd'huy ou demain,  
Plorez, plorez le sang humain  
Par iniustice respandu,  
Et la necessité du pain  
Des pources, qui ont tout perdu.

Plorez aussi messieurs les Nobles  
Ceux de vostre sang, qui se sont  
Declarez vilains & innobles  
Par heresie ou ils mourront,  
Considerez les maulx qui font,  
Et pour monstrier à tous les grans  
Qu'à leur maulx n'estes adherans  
Ne condescendans à leur loy,  
Mourez sur la fin de vos ans



# LA SINGERIE

Tous pour Dieu, & pour vostre Roy:

Plorez mes Dames de la Court  
Vostre grand' superfluité,  
En ce malheureux temps qui court  
Plorez vostre mondanité,  
De voz souffletz de vanité  
Vous auez allumé ce feu  
Pour donner à voz plaisirs lieu,  
Et prins par vne ambition  
L'habit de l'homme, ce que Dieu  
Ha en abomination.

Plorez vsuriers voz vsures  
Vostre malheureux train mauldiët,  
Voz faulx poix & faulses mesures  
Qui vous font damner à credit,  
Dieu par ses prophetes vous dict  
Que si d'une grand' repentance  
Ne faiëtes fruiëts de penitence  
Que vous mourrez du glaiue aux champs,  
Et que de faim & pestilence  
Es villes mourront les marchans.

Rabaissez dames de Paris  
Voz grans colletz & colerettes,  
Et plorez avec voz maris  
Tant que soyez de dueil replaiëtes:  
Plorez, regardez qui vous estes,  
Rabaissez vostre grand orgueil,  
Qui ne sert que d'offenser l'œil,

Voz pompes & cheueux cachez,  
Et vous vestez d'habit de dueil  
Plorant deuant Dieu voz pechez.

Vous messieurs du Conseil priué  
Qui pouuez beaucoup de bien faire,  
Et qui voyez tout desruié  
Faulx de bon ordre en l'affaire,  
Commencez à faire refaire  
Iustice, par toutes les Cours  
Des meschans, qui ont regne & cours:  
Car tant que permettrez deux loix,  
Soyez certains qu'aurez tousiours  
En France deux Dieux & deux Roys,  
Tous les habitans de la terre  
Plorent voz offenses qui ont  
Engendré ceste grosse guerre,  
Où plusieurs d'entre vous mourront,  
Mais ceulx qui du costé seront  
Du Pere, fils, & saint Esprit,  
Bataillans contre l'Antechrist,  
Et non pour vne vaine gloire,  
Seront Martyrs de Iesus Christ  
Et obtiendront paix & victoire.

Or Sire, pour conclusions  
Si vous voulez appaiser Dieu,  
Il les fault sans remission  
Brusler tous vifs à petit feu,  
Et que iustice droicte ait lieu

Enuers les deffusdiets Marmots  
 Lesquels vous ont tourné le dos:  
 Et pource prince familier,  
 Faiètes remettre les fagots  
 Dans ledict feu sans deslier.

Car vostre iurisdiction  
 Où tous & toutes subiects sommes,  
 Fera plus d'execution  
 Que ne feront cinq cens mille hommes,  
 Si vous auiez dix mille sommes  
 D'or & d'argent loyal & bon  
 Et des gensdarmes à foison  
 Pour penser vaincre leur malice,  
 Iamais vous n'en aurez raison  
 Que par le moyen de iustice.

A plusieurs des chiens enragez  
 Vous avez pardonné le tort,  
 Dont vous nous avez engagez  
 Es mains du glaive de la mort.  
 Pource seigneur puissant & fort  
 Si voulez que tout renouuelle,  
 Faiètes punition nouuelle  
 Sans en parler à leurs amis:  
 Car la chair & le sang reuelle  
 Vos secrets à vos ennemis.

Si vous deffaillez d'un seul poinct  
 Enuers Dieu, c'est autant qu'à tout,  
 Et pource ne pardonnez point

Es plus grans qui nous troublent moult,  
Jamais vous n'aurez fin ne bout  
Des guerres, par pardons ne bulles,  
Si ceux des conciliabules  
Qu'on voit tous les iours en erreur  
Pourmener dessus grosses mules  
Ne sont punis à la rigueur.

La protestation de foy  
Qu'ils feront d'estre Catholiques,  
Sera contre Dieu & leur Roy  
De mourir parfaicts heretiques,  
Meschans, malheureux, schismatiques,  
Qui nourriront plus d'heresie  
En un iour, que de vostre vie  
N'en scauriez faire exterminer,  
Donc tout vostre peuple vous prie  
Luy faire iustice regner.

Gardez vous de la singerie  
Des susdicts Marmots & Guenons  
Qui n'ont amendement de vie  
Ne propos qui soient beaux ne bons,  
Ce n'est que toute refuerie  
De leurs synodes & sermons,  
Plus masquez en leur diablerie  
Que ne sont porteurs de mommons.

Et pour en auoir tost la fin  
Soyons à priere excitez,  
Et plorons nos pechez, afin

Que Dieu preſerue noꝝ citeꝝ,  
 Villes & vniuerſitez,  
 Et que noſtre Prince Chreſtien  
 Prenne conſeil de gens de bien  
 Comme vn bon Roy benin & doulx,  
 Ce faiſant, tout ira ſi bien  
 Qu'il ſe contentera de nous.

Donc ſi nous voulõs que Dieu retire ſa  
 main de iuſtice, nous n'auõs autre moyen  
 que nous retourner vers luy : car manifeſ-  
 tement & apertement ſon ire eſt reſpãdue,  
*ſuper vniuerſum populum*, pour l'abondance  
 des iniquitez : & pource dict le prophete  
 Ioël, qu'on ſonne la trõpette, & q̃ tous les  
 habitãs de la terre trẽblẽt & fremiſſẽt des  
 choſes qui ſont aduenir : car Dieu a deli-  
 berẽ de faire vne executiõ de vengeance,  
 pour les abominatiõs reſpãdues deuant ſa  
 face. *Expergiſcimini ebrij, & ſlete, & vlulate*  
*omnes qui bibitis vinũ in dulcedine, quoniã perijt*  
*ab ore veſtro.* Reſueillez vous (dit-il) yuron-  
 gnes, qui vous delectez à boire le bon vin  
 doux & ſauoureux, & qui prenez voz plai-  
 ſirs & ſoulas à yurõgner & gourmãder, de-  
 puis le matin iuſques au ſoir, pleurez & vr-  
 lez, car il vo<sup>9</sup> eſt oſtẽ de la bouche, & pour  
 voz offeſſes & pechez Dieu fera monter  
 ſur voz terres innumerables gẽs meſchãs,



larrōs & saccars, qui mettront voz vignes en desert & friche, & osterōt de voz lieux saincts l'offertoire & oblatiō (c'est à dire) le S. Sacremēt de l'autel. Ce q̄ no<sup>9</sup> voyōs en plusieurs lieux & prouinces, où ils meurēt de faim spirituellemēt, & nous corporellemēt, par ce que *Deuastatū est triticū*, le blé est gasté & destruiēt: donc ledict prophete nous excite tous à faire penitence, & dict: *Accingite vos & plangite sacerdotes, ululate ministri altaris.* Vous prestres & ministres de l'autel, plorez & vrlez, sanctifiez le ieufne, & criez à Dieu pardō & misericorde: car le iour de vostre visitation est proche. Et le tēps venu, dict le prophete Ezechiel ch. 7. que celuy qui achete ne se resiouisse point, & celuy qui vêt qui ne plore point: car pour l'idolatrie de voz richesses, & grans biēs, Dieu dōnera tout pour pillage aux plus mauuais garçons de toute la terre. & pour ce, dict le prophete Osee: *Audite hoc sacerdotes, & attēdite domus regis: quia vobis iudicium est,* Escoutez prestres, & vous maison du Roy entendez: car c'est à vous que appartient le iugemēt, Dieu vous faict sçauoir qu'il est vostre correcteur, & qu'il vous punira de voz negligēces & dormitiōs, par ce q̄ vous n'appliquez vostre estu



de retourner vers luy, & q̄ l'esprit de fornicatiō est au milieu de vo<sup>9</sup>, & ne recognoissez les graces & benefices, par vne ingratitude, qui vous faict trebuscher en tout vice & peché, il vous dict q̄ les iours s'approchent, qu'avec voz brebis vous le chercherez, & il s'esslognera de vous, par ce q̄ vous avez engendré des enfans d'iniquité; qui sont (dit mōsieur S. Augustin) voz œuures & operatiōs qui vous condānerōt és iours de son ire & vengeance: car vous avez preuariqué & transgressé les cōmandemens, *sicut fauces latronum*, & cōme guetteurs du sang innocent, qui n'avez semé en ce mōde que du vent, duquel ne recueillirez que tourbillon, voire de sorte (dict le prophete Osee) que, *Germen non faciet farinā, quod & si fecerit, alieni comedent eā*, Le germe de vostre semence, ne rendra point de farine, & si elle en faict, les estrangers la mangerōt. Helas mēssieurs les prelatz & princes de la terre, *Quid facietis in die solenni, in die festiuitatis domini?* Que ferez vous au iōur solennel, au iour de la feste de vostre Dieu, cōme rendrez vous compte d'une infinité de pources ames perdues par vostre deffault? Mal-heur sur vous (dict le prophete) qui vous estes veaustrez, & couchez sur les

grans tas de blé & tonneaux de vin, sans auoir pitié ne compassion de voz poures brebis, qui crient de faim & froit à la porte de voz chasteaux & palais, pour la necessité du pain, qui leur deffault, à vostre ruine & confusiō, dont vous estes venus & descendus iusques au fond d'iniquité, & pour ce dieu dict qu'il vous a en haine, & qu'il vous bannira de sa maison, pour la malice de voz inuentiōs, voire & tous voz auares mercenaires (dict le prophete Ieremie) qui se sont nourris & refectionez au milieu de voz troupeaux, *Quasi vituli saginati, versi sunt & fugerunt simul*, Cōme gros veaux se sont engressiez & refaicts, & ont prins la fuite ensemble en ce tēps de trouble & guerre, pour lesquelles choses (dict Dieu) ie les feray vous & eux tomber en la main du glaïue de mō ire & fureur. *Pastores multi demoliti sunt vineam meā*, Plusieurs pasteurs ont destruiet, & gasté ma vigne, (c'est à dire, mō Eglise) de laquelle ont pillé & sacrilegé les saintes reliques & ioyaux, & ont foullé & cōculqué aux pieds le fruiet d'icelle, & rendue comme vn desert sec & aride, dont elle a lamenté vers moy, & pource que nul d'eux n'a prins la matiere à cuer, les dissipateurs de la terre y sont

descendus, & l'ont destruiete & desolee,  
 sans que personne se soit mis en deffence,  
 & pour ce (dict il) le glaue de Dieu les deu-  
 uorera depuis vn bout iusques à l'autre.  
 Voyla messieurs les prelatz & princes du  
 monde, les menaces que Dieu vous faict,  
 & les peines deuës pour le deffault de voz  
 offices & estas: & pour ce nous supplions  
 vostre benigne grace & clemence, auoir  
 memoire & recordatiõ de la fin de vostre  
 vie, & dõnez ordre à ramasser voz poures  
 brebis esgarees: afin que d'eux & nous ne  
 soit faict qu'une bergerie, sous vn Dieu,  
 vn Roy, vne Loy, & par mesme moyen v-  
 ne si bonne reformation des abus, que les  
 Singes, Marmots & Guenons ne trouuēt  
 que redire sur vous, & ce faisant, nostre  
 Seigneur nous donnera si bonne proté-  
 ction & sauuegarde, que toutes les Singe-  
 ries des bateleurs & forciers de la nouuel-  
 le derrision, ne nous pourront nuire en  
 sorte que ce soit, & par ce moyen, nous  
 donnera sa grace, & à la fin sa sainte be-  
 nediction.

Amen.

F I N.















81

194

110

